


文莊集

欽定四庫全書



文莊集卷二十一

宋 夏竦 撰

重修潤州丹陽縣門樓記

縣門樓建鼓之所也號令之發始乎鍾鼓興居之期啓
閉之節由是乎達故其墉歸如其樓軒如冠廳事旁屋
狀人之有冠冕若之何毀之今年夏初予視厥職憫夫
斯樓積有年所墻敗于左木隳其右風雨所陵埃壙所
侵官而弗省其誰治之乃役百工餘指伐木十餘本易

其數梁替其數楹塗其墉楮其欄取其壯而不取其宏
務其完而不務其華後負練塘前壓驛道山阜表其東
津梁續其右望之敞然有官府之風登之廓然有小天
下之心使吾民如樓之完善政如樓之新則百里之間
可以無瘡痍矣後之為政者可不勉之哉

賜杭州靈隱山景德靈隱寺常住田記

會稽之西部吳郡之東境山之美者武林在焉晉咸和
初常有梵僧歎其峻極以為鷲峯別嶺飛至茲地由是
依山起刹名曰靈隱蓋言靈山之隱于此也竒跡既彰
歷世增葺繚垣危磴叢楹鈎檻樓觀之華勢勝之美首
於餘杭善巧啟導之師若燈炬以相續精勤憤悱之士
譬雲霧而畢臻世有人焉其來尚矣國家同文區夏洎
聲葱雪五天飛錫四海浮盃訪道而來解裝相繼天聖
之間有衆七百每結趺聚飯應器如雲俱羅之施難充
維摩之化靡及爰有上首始議墾田迺獻像于東闕請
播種于南畝我尊號皇太后恩深外護心等大慈授諸

佛之記言布羣生之勝利威光所照物成金色慧力之感地見寶嚴若夫平決萬機將明百志動遵法度慎守典彛以為道釋名田禁于創置國之舊制豈敢廢焉然吾保育嗣皇紹隆景業素依佛寶享祐帝躬冀其萬壽無疆百祥申錫在諸服玩予何愛焉乃賜直百萬市田二十五畝以施之歲輸舊賦天下之為公也永充淨供福田之無極也彼給孤施園非續命之要妙意設食無宿飽之資若此因緣則為殊勝乘天時以稼護絕水火之虞治防庸以蓄泄靡旱潦之患地種盡墨而可窮此功德無窮恒沙皆寶而可盡此布施無盡諸菩薩僧觀是田者應合釋迦如來以信心為種以精進耘鋤因田以悟法諸大比丘受是食者應念香積如來以甘露為味以大悲普熏因食而證道然而悟無所悟者正悟也證無所證者真證也無離塵垢以染于淨無求寂默以住于空三界不見于身心萬法本忘于封境舉足所之皆是道場適意而居莫非宴坐夫如是者始可以享斯

田施消此飯香報兩宮之慈恩續諸佛之慧命也哉臣
幸預譯場叨觀秘藏遐推往記切考茲山能仁出世千
載而神僧建寺七百載而聖人施田由是知山川龍象
抑有冥數以待聖神乎奉命昭記刻彼靈區皇太后右
序嗣君崇修妙果施夫疆畎教天下之至慈也皇帝尊
事母儀布宣聖愛勒于金石教天下之至孝也率土之
濱含生之品一切見聞得不踊躍于茲辰哉時天聖四
年歲次析木仲夏望日謹記

御書慈孝寺碑額記

慈孝寺成朝廷命史官頌故實將昭銘於金石永垂耀
於文象聖上穆清之暇熏被以觀且曰先帝大猷太后
聖德備在茲矣非天下之妙翰孰為奇麗之觀非朕躬
之親筆罔罄寅威之禮繇是上自題額命翰林學士綬
書文百工相趨萬區載躍以為極帝王之能事敦恭愛
之大本英華聖域焜耀國經巍巍乎亘千古而不朽者
也皇太后歎嘉睿志濬發慈旨申命史氏識諸碑陰臣

聞聖人因親嚴以教民故能感天地本文治以化下故能緯風俗然則召至和之應成惟幾之務垂世烈而潤皇業者必繇斯道洪惟上聖天縱多能厥初啟朱藩踐震邸典學時敏博志大成及乎集丕統迪詒謀益復研精書林垂思藝圃探七經之奧蹟鑒百王之治亂非仁義不圖於政非禮樂不訪于朝而又師臣勸講之餘碩儒進讀之暇寶跗在御畫漏移刻秦峰之篆頡篇之楷倒薤之妙拂素之工出自生知動超神品嘗以為開元以降御題碑榜標桐柏以尊道揭麗正以崇儒未足以移雅俗之風恢至要之體故是寺之建也飛白崇真之額所以奉先猷攄永慕照定陵之遺烈以繼文而教天下也玉篆慈銘之首所以宣懿錄闡慈訓尊長樂之美業以愛親而訓四海也昔羲畫八卦以啟人文禹錫九疇以贊皇極叅之聖功偕為盛矣若乃翔翬結宇液金填畫騰虬龍於螭首潤雲露於翠珉映調御之相光陰詞臣之妙墨奎躔婉其鈎曲珠斗煥乎闌干固將太一

下觀百靈潛衛為億祀君臣之法昭兩宮孝愛之德也哉臣忝貳近樞荐拜嘉詔仰欽累盛之懿彌負重陳之怯唯頌次典則勒諸左方云天聖六年八月朔日謹記

青州州學後記

國家制天下肇有十八路京東首焉西起甸服東漸淮海南畧洙泗北際河濮關防之要控制之重城闈之大室居之盛青復首焉建隆距明道繼政四十有二皆巖廟勳舊臺閣材彥方重鎮俗嚴明馭下信孚惠洽吏端刑清潤金石藹謠誦固亦多矣若恢教化之原崇學校之美惟丞相太原公有焉天聖七載公委遠時柄來牧故鄉以平章庶務之心斟酌元化之手裁量一郡豐功懿蹟不容談矣其寂為薦紳所稱道者以公頃奉鄉書偕郡計冠多士長百工泊偃息作藩雍容立政事必敦本仁不遺忠也舊欲報朝廷而不已德也將流里閭而不竭於是出私俸起官學天子賜圖籍掾屬制油素三齋懷筆千里擔簦鼓篋於朝佔畢于夕數學在焉若夫

明大道之本觀三千之奧將欲佐人主庇生民經緯
天地制作禮樂刻百代之弊定一王之法者可以謂
之文矣騁六藝之精練當時之務將欲對清閒之間廣
漏刻之聽高議雲臺以決安危約史金匱以定褒貶者
可以謂之學矣博貫百氏並授五業將欲藻潤謨訓勸
講帷幄主文以陳諫道托寓以達下情箴規庶官粉澤
時政者可以謂之材矣記問之師句讀之學飾小辨事
空言誚譟相高篆刻自嘉白首弗底於道盈編無益於
世者丞相耻之予亦耻之東秦奧區全齊盛府俗漸鄒
魯之教人多海岱之靈朝家好文輔臣善誘而不能寶
寸陰刻素志扶名教訓孝悌建希世之策敷及物之德
彼維師賜履於周平津始封於漢果何人哉游於斯者
無自局焉建學後三載東土荐飢予猥奉使指謬踵前
良且以疇昔政司陪貳台鼎敢勒與頌以求德音詩云
君子能長育人材傳云得天下英材而教育之茲學之
謂歟堂皇之建職次之設皆備前記此不復書時景祐

元年正月朔日記

海雁橋記

頃歲山東旱蝗予被詔救寧下穆陵並濰水出萊陽轍黃睡野無蔬茹市無血骨有客饋海鴈六弗忍為膳育於青州之柳亭亡其一後數載予內徙睢陽輦五鴈縱之南湖一夕舊客過都知之撫掌橋側五鴈悲鳴飛集圍繞膝下至暮戀戀不能去觀者為之出涕斯禽受人之恩不過稻梁養育歲時耳尚數年而不忘其主前史有委質事君高軒列鼎而不能盡心於王室者殊可嗟焉國風美闕睢之不淫嘉鴈鳩之均一蓋有資於王化也因題是橋為海鴈橋以旌之時景祐三年十月日記

青州龍興寺重修中佛殿記

左海瀕右岱畎沂蒙亘其南河濟徑其北厥壤廣衍惟青州焉唐以盧水平地置平盧軍其城縈帶山岳控引川瀆氣候高爽風物楹盛雅俗雜處修塗四達富焉庶焉東夏之都會也中有佛圖實曰龍興寺舊以為田文

之第地勢斗絕堀坳洋水之陰樓觀飛注翱翔重圍之表東踐絕澗徑度於闐闐西瞰羣峯旁屬乎原野十二之勝盡於茲焉寺中有殿宋元嘉二年建甲子十周棟宇隳圯常住比丘晝樞化青人得鏹三百萬以新之又錮以石階繚以髹檻後增二亭左以蔭銘識右以藏鼓格世傳孟嘗飯客以鼓為節其格存焉載祀寢久木石剝脫但上畫飛仙殆非當時器而寺僧寶之以傳疑焉或曰佛何為者邪夫太始既分皇衢既遠舜禹揖遜湯武干戈自撲而雕自淳而漓姦宄鋒起智詐火馳是以天生聖人于叔世分三教以救之九州之載人性淑均道德可以化焉禮樂可以教焉故商武丁時生老聃于瀨鄉周靈王時生仲尼于昌平流沙之外西戎即叙非威神攝受權實開遮莫能變獷悍勝殘虐故昭王時生佛于毗嵐然今古之論罔不折衷于仲尼昔夫子自謂則曰文王既沒文不在茲乎於老氏則曰其猶龍邪於佛則曰西方之人有聖者焉以是論之則釋老皆聖人

之救世者也夫子不之譏焉或曰樞之新是殿有功德邪夫天地者煩惱之燬宅也世界者生死之業流也人之生也與愛俱生怛快乎名利益纏者嗜欲鳥驚獸駭馳走乎烈焰龜沉魚躍出沒乎驚波譬元明而不知甘衆苦而不恨忤忌而得者謂之能放肆而前者謂之達其生也與夢寐等其死也與糞壤俱聖人哀之故為之御三乘之輪艤六度之航以接癡冥以拯昏溺後之登是殿者若睹相好以攝心歎寶嚴而起信固可以遠謝塵垢坐空妄幻若瞻白毫之光悟見精之不動聽寶鐸之音覺聞性之常寂固可以返照實際旋復本初證菩提心成無上道由是觀之則樞之於茲殿有無量功德矣予嘗守茲境目樞之勤聊紀勝因以刊石時景祐四年八月朔日記

杭州寶雲寺記

寶雲寺者吳越忠懿王所建千光王寺也西方之教東流震旦盛衰由於抵劫輕重繫于震歷五代紛競諸夏

陸梁妙音阻而不通法器垂而將墜惟錢氏之守淞水也稟天王之正朔受如來之教戒是時吳楚間國號為有道諸侯帶江負海列郡十三數世百年干戈不試蓋以為得大雄法力故竭寶玉崇塔廟具香華鳴鐘鼓以事之嘗有里人張仁昭者誦薄伽梵姥陀羅尼積有年所感召殊祥攝衢州刺史翁成起聞之欲旌其事乃請於王以乾德戊辰歲春二月創是寺于錢塘門之西建千光王像因以名之其制則臺門前闢紺殿中立高樓東建鴻鐘屢發案臺西峙龍藏常轉旁儼像設後引堂構經齋方丈溫室雲厨四百其楹再閏而畢面白傅之湖負武林之岫右則鵲巢遺阜左則星隕孤峯石怒欲飛松恠如折梵聲飄海外香雲蔭空際清吹時落纖塵不飛乃朝貴遊心之境蒼生祈福之所始請睦州九峯山僧環省升法堂談妙義未幾而終復請衢州鎮境寺積善禪師義澄登寶座語真空於斯為盛是二師者皆學於郡永明寺道潛禪師悟諸夢幻泡影無有言語

文字以心傳心深入圓頓故其門聽法者朝夕如市焉
洎我國家受命之十八年王倣歸朝奉圖獻地皇明所
及佛日重光雍熙二年寺僧有因請真命於闕下太宗
皇帝詔以今額賜之革偽號也中貴人藍敏正書之勤
佛事也時法鼓重鳴金姿再構讚唄鐘磬盛於往初洎
淳化改號之明年積善大師西向右脅而滅其徒義隆
傳衣受法俄亦圓寂懿夫禪源未涸達士挺生於是義
澄法師屈知寺住師神彩高擴藏識圓明慈悲以道衆
生貞諒以接朝士禪誦之暇務以莊嚴為意故咸平三
祀選日庀工階砌殿堂悉增前制化清虛於妙樂擬莊
麗於祇洹為南國之名區作西郊之極觀有大善知識
作是言曰善哉寺之興也有五善焉張仁昭之感應翁
成起之信重忠懿王之崇建僧有因之請命藍敏正之
書法法之行也有三達焉九峯之證入積善之辯慧義
隆之傳授足以表名山之昭感示皇覺之遺休若夫攝
五善之心證三達之法景行精進十四年于茲者則有法

證公焉浙江東西其名尚矣固可書諸金石垂於不朽者也某素肄典墳專談仁義未窮觀於八藏難了悟於三宗奉運使兵部尚書卽江夏黃公世長之命不敢固辭但記其興置年月傳授次第而已若叙頓漸之宗開權實之義破諸有相以至無生蓋有格言請俟能者

台州延慶院記

臨海濟靈江而西越萬步至括蒼山與真隱山並間有垂流千仞漱石成澗蛟龍宅而雲雨攸生歲有驕陽亢極並禱羣望寂寥無證則邦之守臣帥寮屬而崇之薦牲沈玉以請常有雲油然發乎湫中暝山暨川雷震風動不崇朝而雨足予佐郡再祀而兩往既享既禱絕澗而反至於山麓坦然右平顧之則有浮屠氏之宮在焉道出於側因憇其所視其榜曰延慶院問其僧曰全議考其興替索其傳記則梁天監初始建為龍山寺至唐會昌五年而廢未朞復興開平中刺史駱延訓親篆榜而改之為龍潭院唐祚不永錢氏據有泚水忠懿王倣

始領此郡復新其額為戲龍院皆以邇龍淵而得名也
國家受命旁宣教象我崇文廣武儀天尊道寶應章感
聖明仁孝皇帝告成功之歲有詔賜今額焉問其授授
則遠者不能詳矣詰其近則乾化中有僧常一始旁鑿
阜全葺棟宇次傳慶仁道進雲泰雲興令逢至于全議凡
七世矣其殿宇廊廡多全議糾檀施所就也觀其巖岬
齟齬溪流沕滴古木怪石偃蹇盤踞雲物萬狀融冶凝
結疏篁茂草挺擢蔓衍高下嚮背宛為靈區嘉遯之室
不築講學之館未締竺乾氏方牆華屋即而有之於戲
盛哉麗哉既盛且麗控引勝絕四方之中豈獨於此予
闕掌郡事政不專出無明誠以感造化無至仁以召和
氣雨不時至下民其憂故再走靈湫得請於廟憇於是
舍須雨而旋噫豈人至靈而弗神於龍彼裸壇於齋者
獨何人哉豈脩已行義之有所未至乎當以日繼月而
誠吾志屬寺僧全議固請作記因并書而授之俾勒于
石使後之識者覩斯文知不徒然而作也

台州天慶觀三官堂記

台之郡治東出百步且北抵山有古宮室舊傳茅盈駕鶴上仙始建為白鶴觀既廢至唐明皇興之築天寶之臺于庭書以開元之榜唐命既草棟宇將朽洎天福五載永嘉威儀葉後已之門人太原太師黃永乾惠然來居始議興葺凡五十祀乃傳門人張日損太和冲融悃悃無華黃老之教擇其正而後學藥石赴人之急不避風雨時議以為長者上即位之十二載勅本郡以禮遣至闕辭疾不起由是遠民始知日損有高尚之節會國家降禪于社首有詔改賜觀額為護國由是遠民始知朝廷有清靜之治乃有石湛來浚等獻直三十萬請新三官之堂以列塑像以廣焚修既就予往觀之而不知其何神日損曰道家之說太虛之上虛皇在焉分命元卿治於紫微艷都清冷之宮而三元按籍考察天下有猾黠詭異苛忍暴慢險詖隱匿僭妄欺偽者可殺可奪可貧可賤有信厚仁惠恭遜和易謹愿端方孝弟正介

者可安可壽可富可貴故上天有命宥無聲疏而不漏如合符契者三官之職也噫吾嘗讀聖人言有云死生有命富貴在天又云皇天無親惟德是輔故常疑造化中有主邪其自然耶果如日損言則三官其為主者乎夫位有上真職司造化能使天下枉者直善者安暴者天仁者壽貪者損廉者益雖盡杞梓之材為之宮備山龍之章為之服罄玉帛之禮為之薦日祀而辰享可矣非謂無名之土木也予結髮讀書弱冠為吏未嘗為惡惡亦不及從今以往益致于善以聽陰陽以驗三官之說

欽定四庫全書

文莊集卷二十二

宋 夏竦 撰

序

重校妙法蓮華經序

三世諸佛為衆生出現證無所證得無所得者一大士而已妙萬化而無象應羣有而難名不著世間猶如蓮華故竺乾大士集靈鷲遺言曰薩達磨奔荼利迦魏梵僧支強梁接譯于交趾初成六卷翻薩達磨為妙法奔

荼利迦為蓮華是名法華三昧晉燉煌僧竺法護譯為十卷名正法華分二十七品後秦鳩摩羅什益普門一品譯為七卷名妙法蓮華隨崛那笈多益藥草喻品之半以提婆達多通入塔品名添品法華唐道宣律師叙云三經文旨互陳時所崇尚皆用秦本自漢至唐六百餘祀受持盛者無出此經五代以還諸侯僭據字音句讀方言多誤國家混一寰海聖上尊用三教余家世奉佛乃取世傳諸本及化外舊經譯文摘句數自參較又以悉曇梵夾旁行右讀中原傳譯始創卷軸討論重複卷舒繁數因觀近世圖籍鏤刻摹印綴黏成冊差便于古由是命工倣則肇製此經庶幾學者易為究覽此經序品至勸發十餘萬言貫穿諸宗融通萬法或伽陀孤起或祇夜應頌文有廣略以接三根機有深淺以醜衆請喪實際者為之譬寶藏執涅槃者為之指髻珠淪世苦者為之諭汚宅樂小法者為之演化城闢甘露之門以來衆軌均大雲之澤以徧羣生大方無隅則有地墨

劫塵之談至神無方則有眉毫舌相之變會權實之戲
論設頓漸之假名使三獸渡河並臻其量五德憑軾各
應其緣諷誦可以殖福田解說可以標慧炬大慈方便
其在茲乎至哉清淨靈覺廓大虛而含法界光明寶藏
消幻想以契真如境既對忘心將安寄見有迷悟體無
去來妙本圓常超然獨立資始萬行孰除其方若乃以
解脫為蓋纏以照覺為封累掩室摩竭杜口毗耶名言
道斷思惟路絕則神而明之在乎其人然而能趣百善
者信也善度衆苦者解也信解之初必由緣感皦月不
能現空器膏雨不能生槁木後學菩薩韋精進而求諸
時皇祐三年夏四月乾元節日謹序

楞嚴經序

夫善言佛者惟性而已矣混成不測况之道乎無方善
應况之神乎湛寂精常圓滿平等迎之不見其首隨之
不見其後生生而不生化化而不化包裹萬有含吐十
方資始衆緣具足萬行光明密照而非色靈通潛運而

非空世界遷變而不移山岳旋偃而常靜現前而惑者
不辨日用而迷者不知易曰寂然不動感而遂通老氏
曰獨立而不改周行而不殆其性之謂歟無始劫來一
切衆生攀緣外境忘失本心分為四纏疊為五濁馳而
為妄想結而為昏翳聚而為煩惱流而為生死累我真
源枉入諸趣如來哀之此楞嚴之所以作也以衆生苦
於奔逸故為之行三觀滯於色相故為之指八還誤認
塵根故為之辯六入妄計因緣故為之談七大至於屈
伸金臂縮疊華巾極善巧之喻拂微細之感令瞻寶光
者知見精之不搖聽鐘音者悟聞性之常在若迺本明旋
復靜慧發生御最上之寶乘游無邊之性海頽色身若
微塵視太虛如雲點彼無始輪轉之根億劫顛倒之見
我人妄執壽命浮想若熾炭之燎鴻毛烈日之晞朝露
不待思惟已自消釋大哉菩提妙圓本始清淨既無妄幻
翳於真精豈有身心受彼生死水澄潭去漏盡法除萬
行不修而自圓六通不求而自證預於此者非至神乎

然而經撮八藏之精要窮萬化之根源譯之者務簡
潤之者尚辭或使覃研泥於句讀故有僧可度為之箋
分詳畧有叙華梵兼該迨歲再周能事方畢後之觀者
應當反夢想之緣氣遺心目之習因了識精之元還獨
妙之本雲駛月運既息於諸旋木盡炭飛亦亡於幻法
秋毫不立真理自冥彼求諸佛無漏勝解者幸精進於
斯焉時景祐四年二月朔日序

桂籍追榮序

樞密相國太原公次子故衛尉寺丞某字慶之幼而辯
悟不樂戲玩始就外傳卓如成人屬詠景物動會辭律
洎勝衣趨拜風度彌遠客卿沉敏若懷將相之器褚陶
清談自得墳典之娛志慕老莊譽等終賈嘗耻由官蔭
刻志緗素曾未卅歲文藻粲然金籟之言發於鄒魯玉
樹之秀茂於庭階咸以為天資美材性識早立沐浴聖
化被服詩禮固將騰天路摩絳霄超野絕羣一日千里
御屏隔坐紹亮隲之榮緇衣改為宣桓武之德於戲天

道云遠大化難謀育而不苗聞者增歎上閱其幼慧贈
襪有加追賜進士及第以成其志有詩賦雜文二十卷
題曰桂籍追榮集所以紀漏泉之澤昭夙成之美死而
不朽其在茲乎時大中祥符六年十二月日具銜某序

宰相部威重篇序

傳曰有威可畏謂之威又曰君子不重則不威况夫應
槐鼎之象處巖廓之尊萬民具瞻四國為憲固宜資性
端重容貌祇肅履有常度居無惰容悼服遠夷得真相
之體表率羣后有大臣之風所以享高明之寵總裁成
之業致遠任重而克濟焉

將帥部議論篇序

夫好謀而成名臣所以建議無文不遠君子所以尚辭
降自漢代率勤遠略間有仁賢之將克敦詩禮之規洞
察蠻夷之情精通軍陣之要或圖上於方畧或欽承於
訪問辨安危之本明勝負之端碩畫是陳遠圖斯亮用
能克濟大難式集茂勳垂厥令猷蓋可察也

將帥部強明篇叙

易曰自強不息書曰明作哲蓋強者臨機而有斷明者
遭事而不惑况夫折衝邊圉濯征寇戎軍政貴平事機
尚速故有負英果之畧懷擿發之材周知敵情詳見疑
謬俾姦偽之黨畏其聰明貔虎之師伏其雄毅克貞師
律用集茂勲者焉

將帥部受命忘家序

傳曰將受命之日則忘其家臨軍約束則忘其親蓋軍
旅之事安危攸繫將帥之任社稷是毗固當以孝而資
忠以義而割愛受詔引道初無辨嚴憂國忘身靡顧私
室聳英烈之風擊為忠義之模楷宜乎錫以土宇紀之
旂常者哉

將帥部不和篇序

傳曰師克在和不在衆又曰安民和衆蓋軍旅之尚和
也久矣夫師出以律順成為臧固當輯睦兵戎克濟勲
畧其有處營衛之任握旂鼓之要受服偕出援枹並行

忘從帥之義恣兼人之勇專逞其欲不相為謀或大呼于和門或盛氣于幕府至有乖異籌畫違沮期會反干戈而鬪奪鼓吹以往棄公家之事為仇方之利暨乎覆軍奪爵而不悔焉孟子云天時不如地利地利不如人和誠哉是言也夫

閏位部知子篇序

夫知子莫若父知臣莫若君蓋父子之間否臧易辯齟齬之際性習已彰若能鑒其誠明道其外飾闕其好美之意觀以成人之風自邇察遐材將焉適况夫負英武之畧應偏閏之位固宜念國家之重審齋嗣之能建為元良付大業而不墜授之事任被諛謗以無疑書諸簡編亦王者之懿德也

邦計部貪汙篇序

詩云貪人敗類傳曰貪以敗官為墨蓋貪而不敗者未始有也夫小人縱欲棄義貪冒榮侈心甚卽壑莫之盈譽語利於市猶為不可况夫寵以車服委之官司總筦

權之任舉飛漕之職內度經費外調輿賦詎能避白圭之玷全素絲之潔唯以取捨由己奢僭是圖虐下以刑傾衆以勢侵盜于國誅求於民聚斂積實不知紀極以至苞苴盈門簞篋不飭羅罪罟伏歐刀而不悔焉於戲子罕云吾以不貪為寶誠君子之格言哉

學校部讐嫉篇序

仲尼沒而微言絕七十子喪而大義乖周室道微漢承秦弊春秋為五詩分為四聲名家之學樹同門之黨自茲厥後異端蜂起奚獨師授之不一固亦克伐而相勝其有肄章句之業背和裕之德己之失必緣飾以為當彼之是必倚撫以為誤庠序之間權詐騰涌講習之際譏詆紛錯務在擯斥動成仇怨或忿爭於朝廷或遷謗於祖裔位上者擠陷於罪罟旅進者潛肆於圖害語云道不同不相為謀其是之謂哉

卿監部邪佞篇序

易著閑邪之言傳垂遠佞之戒况夫職象河海任重股

肱固宜采其聰明好是正直若乃阿諛靡媿巧令是圖
蒐慝庸回廢忠毀信行媚以希于上肯獻賦以悅于邇
臣增宮禁之素規亂禮樂之舊物用速官諂或煩刑書
於戲先王之所以難任人者其以是夫

總錄部說佞篇序

有虞之命則曰聖說先聖之戒則曰遠佞人蓋邪偽
可以惑聰明浸潤可以間忠信淳素既隱巧詖滋萌義
以利遷政由寵放故有行媚于內善諛于朝脂膏其性
以悅于上貝錦其辭以譖于下爰同疾異害正忌能挾
蒂芥之嫌緣疑似之隙媒蘖其短文致厥辜采苓之刺
以興投杼之疑斯起交亂家國離間君臣職為屬階無
已太甚故君子之惡利口國家之難任人其有旨哉

總錄部傲慢篇序

夫傲以取禍往事之明規慢以失官前言之深戒自東
周不競禮度寢微驕倨之俗興而遜悌之風缺仲尼垂
叩脛之戒穆叔著倍賦之文自是以還風流不泯或恃

才而陵長或盛氣以傲人忽禮容而不修茂年爵而罔
顧至有箕踞而傾倚岸幘以嘯詠跌宕適意豪縱亂常
招負俗之累嬰自貽之戚於戲書云簡而無傲詩云彼
交匪傲萬福來求誠為君子之道哉

欽定四庫全書

文莊集卷二十三

宋 夏竦 撰

賦

河清賦

有客謂臣曰朝廷將祀汾南為民祈穀大河載清於陝
之服子嘗聞其說而頌其異乎臣曰傳遽之吏罕聆朝
議願客攄抱劇談開我以嘉瑞客曰唯唯蓋聞滔滔靈
源發自崑崙導于積石出于龍門懷砥柱而勢迴播

鉅鹿而派分三王先之於祭四瀆宗以為尊千里兮一
曲濁流兮渾渾乘春則桃花競湧赴下則竹箭爭奔若
澄清而變色實千祀而疇德為中夏之經瀆故其應有
常通上天之絳河故其靈不測洎我國家秉皇圖宣帝
力尊百神朝萬國光明乎遐絕馨香乎霄極禪云亭而廣
厚玉簡既封祀汾睢而頌祈祇鸞旂未飭西人清候而望
幸六官戒期而勵翼爰薦祉而炳靈灑澄波之湜湜徒
觀其祥風蕩漾非煙蒙霧浮休氣於川上汎榮光於岸
側失洄湧之黃流湛清泠之素液銀潢之影橫秋帝臺
之漿映日江練初靜壺冰乍釋鑑秋毫及纖塵露金沙
與銀礫神魚龍馬泳深淵而不隱紫闕珠宮擴洪流而
可覲合濟瀆兮安辦委滄溟兮競碧吉蠲自等於明水
嘉號宜尊於清滌可以頌於廟式告元符贊於史以永
大謨豈比夫蘭葉朱文涌黃靈之籙芝泥玉神汎帝媯
之圖登夏子之巍巍掩漢唐之區區子盍獻議外廷上
封公車請以水而紀官以瑞而建元然後登歌而率舞

豈非士大夫之職乎臣曰客知其一未知其二上之功不可以方策載上之道不可以金石紀感通靡間於洪纖周流罔滯於形器六合而萬區肅穆而昌熾元符而景命紛綸而沸渭天地清而陰陽既序邊鄙清而干戈不試政教清而無遠弗懷刑罰清而有生成遂道德為休而神靈幽贊仁義為祥而富壽攸暨禮樂為符而上下昭假賢材為瑞而中外允治喬岳未分則三篇降汾祀將禱則真文至旁無垠而高無際充乎天而溢乎地蓋盛德與大業也夫豈河清而已矣客于是色沮魂悸逡巡而退

景靈宮雙頭牡丹賦 應制并序

國家升禪之五祀聖祖上靈高道九天司命保生天尊大帝降禁中之延恩殿真宗文明武定章聖元孝皇帝躬款飈旂祇若靈訓璿源長發真蔭克開建景靈之宮以置祠官構天興之殿以尊肖像獻而不裸唐太微之儀水以節觀周辟雍之制回廊四注雙渠交屬植之美

木間以幽石叢薄互映蘿蔓相縈固列仙之幽館實有
帝之下都也先皇厭代飈駕上賓聖文睿武仁明孝德
皇帝應元崇德仁壽慈聖皇太后哀極孝思禮尊昭事
乃建奉真之殿於天興之左備嚴像設對越威神憲曲
察之規模兼顧成之法度其右則皇帝肅明福之館其
後則太后啟鴻祐之廷並為齋居恪奉時享普觀六藝
眇覲百王尊祖奉先莫大於此是宜靈鑒博臨嘉生誕
降丕顯盛德覺悟蒸黎者哉天聖四年歲次析木甘澍
充浹太和豐融惟時季春吉日丙午羽人動色宮吏告
祥有牡丹之芳叢拆雙跗而共幹樞臣謹職以承獻兩
闈傳視而嗟異爰命國素臨寫英蕤仍詔詞臣昭紀嘉
貺上意以為先聖奉真祖之禮至虔真祖眷先帝之
意尤顯是彰美應發為奇芳臣竊考舊聞仰迪陰騭
天意若曰太后以至慈保右嗣聖皇帝以至孝恭順母
儀總決萬幾大康兆庶真祖降鑒先聖在天樂茲重熙
錫以嘉瑞二花並發者兩宮修德同膺福祉之象也雙

枝合幹者兩宮共治永安宗社之符也昔棣萼承華召
公流詠芝莖連葉漢帝登歌竊比茲芳豈容並日仰應
宸旨謹為賦曰維五行之嘉秀鍾百卉以流形伊牡丹
之淑豔實造化之鴻英襍五色以交麗間千葉以敷榮
結紫心而函實散黃蘂以傳馨幹扶疏而四擢枝綽約
以相承久潛芳於藥錄肆闕載於幽經首春華而擅美
冠花品以騰名何分叢於帝圃遂得地於殊庭蔭琪珠
之璀璨藉瑤草之葱青潤五雲之滋液對六羽之威靈
吐雙葩而並發效神貺以潛呈紅紛敷而接翠香裊
以醜莖較禮織而不異等高下以無傾若霞裳之對舉
類鳳羽之偕升表兩宮之睿聖共一德以隆興實詒謀
之燕翼固道蔭之章明願書芳於信史永傳美於千齡

正家而天下定賦

以家道居正平定天下為韻

夫王者刑於國自於家苟家人之居正則天下之無邪
男女有宜序君臣而甚邇威嚴罔懈制刑政以非賒原
夫九聖微言六虛元造巽離之象攸設家國之文可孝

內惟陰正式符順以之規外則剛中克叶威如之道蓋其以威為本者患愛之不孚以愛為本者患威之無餘思愛育之不黷在威稜而自居恭謹見嚶嚶之儀故有孚於居極侮慢有嘻嘻之象蓋失節于慎初故聖人治家之威刑國之政始親親於九族終明明於百姓恭已則人敢不恭正家則國罔不正則在乎聰明御下端謹存誠言必信而無妄行有常以惟貞陰禮可觀既閨門之肅睦聖功惟叙則區宇之和平故能親賢才放邪佞國之定則家之正家之正則國之定防閑不失信君令以臣行教化無遺見姑慈而婦聽是則德及荒服恩覃溥天四海為家而肅肅萬民如子以平平二女有儀乃虞舜政行之始寡妻可法為文王教令之先是知正於外者先正其中治於衆者先治於寡差於近則失於遠正於上則平於下今上審安危慎取捨家道成於親戚國政行於夷夏易所謂王假有家交相愛也

政猶水火賦

夫濟水者火濟猛者寬苟水火之功罔拂則寬猛之政
堪觀蓋治不得以常舒舒則民慢事不得以常急急則
民殘故君子施之以寬糾之以猛武齊離坎之象自合
陰陽之境謂晦之至兮將闇必繼之以明動之極兮
則勞必濟之以靜是故上善是將炎德其相愛畏之宜
迭用文武之道交光九德用宣始湯湯而洊至百刑以
正俄烈烈以方揚故能成良吏之功立明王之制或溫
潤以和協或彊明而正厲德均烹飪傳齊美於和羹道
合剛柔易同功于既濟然則建皇極合中庸若慘舒之
更用類律呂之相從刑久則殘故賞於春夏賞煩則弊
故刑以秋冬是知物不終衰有時而盛道不終利有時
而病在乎酌炎上以求治參積陰而發政羣生不匱如
符菽粟之資萬事適中奚取韋弦之性蓋以水濟水兮
其德衰以猛濟猛兮其政危猛因寬而不暴水因火而
無虧故法網明明孰見蹈而死者政經悶悶誰敢狎而
玩之故國家宅元功播鴻造流睿澤於潤下發恩光於

就燥儒有服子產之言願佐太平之道

藏冰賦

以冰盛之日藏以昭禮為韻

大寒陰凝國乃藏冰法上天之歷象遵百代之規繩鑿諸窮谷之間清聲競發納彼凌陰之內素彩交騰當其冬氣殘寒風勁溪壑霜皎川池雪映天子于是度時令齊國政詠卒章于七月知邠國之風觀列職于凌人見周官之盛乃矐有司謹而行之將不遺于國用莫無爽于天時納自輿人委截肪之瑞彩閉之冰室積靈王之

寒姿蓋以氣肇微和候殘嚴律念積陰之潛伏懼盛陽之侵軼乃鑿彼凝洹藏其凜慄紅輪引耀導北陸于斯辰黑秬惟馨享司寒于是日莫不陽威振發陰德潛藏禮雖遵於往古事疑出于非常取不失時斬莪莪之素質用之以道結凜凜之寒光吾乃觀其所自知其所以致苦雨之不降亦驚雷之罔起獻羔而啟既不解于東風治鑑而成又何歸於舊水美夫元功可驗至德孔昭不失膳羞之味且無霜電之妖詩謂春開享祖宗於清

廟禮聞下逮頒祿位於公朝我皇上以典故臨人以
文明繼體修時政以施令藏堅冰以示禮故時無愆伏
之災而道光乎祖禰

穆天子宴王母於瑤池賦

以喜逢仙色開
宴真境為韻

穆天子以八駿西巡賓於上真宴瑤池之勝境當甲子
之良辰人間之別館離官如遺敝展月際之珠璫玉佩
自是嘉賓當其碧落凝寒餘霞斂色升繡轂于層路會
魚軒於西極天顏半掩旂翻日月之光鳳髻遙分扇側

鸞凰之翼俄而翠華潛駐彩袂相逢瓊瑤之吉地邀桃
李之嬌容修城而美錦千兩供帳而輕綃萬重廣樂嘉
成徧舞霓裳之曲流霞互舉爭傳瑪瑙之鍾是何雲雨
馳魂笙篁飾喜倦飲霞袂慵凭玉几想臺榭于三島憶
崑崙於萬里鸞驂鶴馭天仗以歸歟玉慘花愁念
芳時之已矣天子乃端冕無言愁臨象筵睨文桂而歎
喟持玉笋以遷延乃歌曰黃金闕兮紅玉泉傳鸞輅兮
逢列仙別可惜兮阻流年愁玉露兮摧渚蓮王母於是

低鬟掩面慵闕錦薦盼龍衣以淒涼叩金盤而婉孌乃
 歌曰琉璃屏兮芙蓉殿接君王分侍歡宴心不留兮思
 宇縣念秋風兮隔紈扇是何樂極悲來烟銷霧開移蹕
 而鴻飛洛浦迴眸而雨散陽臺日照龍旂逐驂騑而東
 下雲藏雉扇隨青鳥以西迴已而悵望空賒音塵漸永
 藥官有意以延想函夏無因而西幸春水白兮瑤草芳
 黯離愁於絕境

吹律暖寒谷賦

以陽氣中暖寒谷和暢為韻

懿彼鳴律中含盛陽激清音於極北暖寒谷於窮荒導
 太和之恩成其地利發重陰之窟被以天光鄒衍以幽
 谷至深平臯可貴思疆理於曠土冀生成于品彙六琯
 乍迴天地之心潛運五音大合慘舒之氣是何清聲激
 越雅韻冲融足以齊六氣和八風歌太簇之聲勾芒發
 外奏黃鍾之氣和粹積中已而遺響未終朝陽乍滿却
 陰涸以冰釋召天倪而風暖其簫韶之響嘹唳鳳鳴非
 孔壁之音鏘洋玉管是何元既著至理罔奸律因陽而

煦暖谷以陰而涸寒正累黍之儀既無失度感好生之德足以勝殘豈不以惟北者陰極陰者谷因推律以條暢故生物而孕育當脉起之際變鴻鹵於閑田觀甲拆之時享膏腴於百穀是知律資太一聲感中和發萌芽之蠢蠢散冰雪之叢叢律本相生自契伶倫之技軍聲不競無慚師曠之歌是知民不干常億猶其上念涼德之可草在仁風之潛暢故聲為律兮感蒼生克符天貺

白雲起封中賦

以至德符通白雲祥呈為韻

漢孝武尊百神朝萬國觀素雲之嘉瑞見東封之盛德
英英初起騰玉檢之晴光皎皎漸升帶金泥之曉色當
其大樂從律靈旗逗風登天孫以讓德禪梁甫以歸功
至理旁達精神遂通上帝之命克彰監于君所泰山之
雲不散出彼封中爾其蒼蔚朝濟氤氳載白俄失素於
霄露將奪鮮於夜魄貫五色之土輝映銀繩透三脊之
茅光連玉冊徒觀其輪囷乍起皎潔斯呈既異赤烏之

色應同白鶴之名紛玉葉之浮光低離印壘動蒼梧之
素影漸過梁盛蓋其神造匪謀元功罔闕德有感而必
屆應無遠而弗至當登封之禮上達於天而雲物之祥
下發於地足以表陰陽合乾符不羣山以遐布不五采
以相踰騰瑞玉之佳色映靈壇之四隅待族以分傍亭
亭而鬱律崇朝而散臨繹繹以芬敷是知白者潔之祥
雲者和之瑞紀於官而天造昭假詠於詩而德音廣被
足令八九之主慚降禪之功三五之君媿升中之義於
時百辟所視明姿聿分天子凝旒既享其嘉貺太史秉
牘且紀其祥雲有處士大夫之識者賦盛事於斯文

陶侃夢飛入天門賦

陶太尉之未達也孤藐貧悴折腰下吏奇蹇未脫於常
數文武不可以自器於時方隅騷動天下恐悚帝將付
晉以大統錫我以佳夢是何天命宥密感通陰陽曜靈
薄暮星芒駢坱營魂愾恍於中夜羽化不知其何術莫
不煙昏霧迷雨驟風疾羽翮為吾而馳張心膽為吾而

曠逸崛起地表翰飛太虛目不暇而自闕心不暇而自
圖若飛龍駕雲而脫泥塗大鵬乘風而戾天衢勢何可
止雄莫之當月輪掩映而閃爍明河沸渭而蒼茫不知
其夢之為夢也踐逍遙之塗屆恍惚之場但謂其飛之
為飛也翔塊坳之墟窮汗漫之荒曾莫知其適從但磅
礴而翱翔忽長空之豁開覩天門而在傍吾謂是天也
駕元精乘灑氣去無不至吾謂是門也排氤氲鼓洪濛
去無不通迅羽而載揚突雙扉之八重闕鍵縱橫以離
立閉閤岌業以穹崇莫不宵露珠落殘霞墮紅織女投
梭而錯睟織阿失轡而怔忡天左旋而且右斗西建而
遽東若長鯨之透禹門而燒尾於春雷龍梭之化屋壁
而鼓鬣於狂風徒觀夫逞雄飛恣心曲吸沆瀣以滿其
志舞星辰以快其欲女媧仰視而顛仆盤古傍觀而拭目
方將以造化之氣為流而刷其毛羽以混元之窟為巢
而栖其爪足何其四方熒熒大明東生餘樂熙而未已
殘夢倏其如驚羽翰雖復於手足魂魄猶翔於杳冥曾

虛實之不辨何有無之足馮謂其實也變化之力飛揚之迹則不可得謂其虛也騫騰所自耳目所記又何如此蓋靈符之先朕天命之不秘俾我材為大國之器道為萬世之利功若舉而無所不至命若飛而無所不遂故范逵有吹噓之象張夔有羽翼之備然則總斧鉞之任受師旅之寄三軍負羽於左右奇兵翼張於要地實若周尚父有鷹揚之號漢將軍有飛將之勢則知自地升天者起家居三公之位天門八重者元戎董八州之事豈必若簡子神遇帝享之以鈞天之樂繆公夢迴天錫之以鶉首之次也哉

草木為人形以助戰賦

以草木殊別有成師徒為韻

壽陽之役兮草木流形陰功化成似代及瓜之戍如屯細柳之營孚甲可觀肅前茅之銳氣成行不亂陳右偽之疑兵當其天挫強鄰神資晉境軍容始耀於勅敵木實潛分于峻嶺衆和可驗盡傾葵藿之心師老無虞未昃桑榆之影由是威加敵國勢壯皇都麗地之形莫辨被

甲之象何殊不齋三月之糧寧無菜色縱乏五兵之器應
有柔弧觀其疏旆寒巖洗兵多露累弦而葛蔓爭引秉
節而松心益固光侵斧鉞應迷謝氏之蘭影接旌旗乍
認將軍之樹懿夫草昧之初天開壯圖闢峯巒於壁壘
變枝葉於車徒欲成橫草之功何須破竹自整如林之
旅不待飛芻已而甲折罔陵風生林藪雖因形以賦象
亦從無而責有苟宣尼之見美不讓芻靈縱蘇代之深
譏何慚木偶故得塵清淝水席卷秦師逐北而蓬飛曉
日解嚴而栢悅朝曦色似忘憂之類怒銷蠲忿之枝慶
賜雖行不受分茅之賞勤歸莫覩誰歌杖杜之詩蓋其
德順人心威乘天討黎元分君子之林猿臂假王孫之
草故能敗符堅百萬之軍都如電掃

狗盜狐白裘賦

以心計所成知
德歸國為韻

智士多機羣心莫知念狐裘之可致非狗盜以難期窈
粹白之珍寧宜鼠首襍重闕疑當其禁衛方嚴珍奇莫
得爰憑齊客之計庶買秦姬之力掖垣徒峻雖崇百雉

之高宮藏非深必遂千金之飾俄而猶豫心決狐趨計
成越虎門而潛伏映麟殿以宵征悄過獬豸之庭無慚
狗態默傍狻猊之柱敢作豺聲已而內府潛通天閣不
阻闔啟扃鑄徧搜囊褚疑羔袖之難辨喜豹祛之我與
鼠偷既遂乍懷輕暖之資狼顧何忙便出深嚴之所是
知四衛非謹千門豈深既得闔欺之便詎聞夜吠之音
漸下螭階覺忘蹄而有意猶憎柱影知顧免以無心蓋
其志在忘身誠思報德潛開篋笥之固果窺蒙茸之色
明眸素齒既私狐貉之衣輕蓋輶軒遂脫虎狼之國故
得鷹揚前席扈從東歸犬馬之勞既立貔貅之勇皆微
閑吏難留不媿雞鳴之智秦謀既失曾無虎視之威則
知小道不遺殊功遂濟翻因守禦之類特作穿窬之計
故先王嚴管籥謹宮閨俱有慢藏之弊

放宮人賦

以宮闕幽閉曉然情愜為韻

隋失民望唐開帝功降鳳詔於丹陛出娥眉於六宮夜
雨未迴儼鬢雲於簾戶秋風漸老失釵鸞於房櫳當其

鳳歷頻移重門久閉蟻聚螭首惟連彩袂步金蓮而共
嘆無偶對鴛瓦而徒傷失儷花冠不整籠鬢髮以全踈
柳帶低垂映蜂腰而更細太宗于是矜絕態軫深情舊
苑而何傷幽閉新恩而盡放輕盈莫不喜極如夢心搖若
驚踟躇而玉趾無力盼眄而橫波漸傾鸞鑑重開已有
歸鴻之勢鳳笙將罷皆為別鶴之聲于時銀箭初殘瓊
宮乍曉星眸爭別於天仗蓮臉競辭於庭沼行分而掖
路深沉步緩而迴廊繚繞嫦娥偷藥幾年而不出蟾宮
遼鶴辭家一旦而却歸華表苟非帝德從儉呈情燭幽
又焉得離永巷別長秋指燕趙之歸路望荆吳之故州
笑迴程而靨帶新喜思往事而眉含舊愁羅衣而颭灑
輕雲競歸巫峽寶髻而屈盤嬌鳳爭下秦樓或繡輦香
車蘭舟桂楫指故里以思動涉長途而意愜飛騰自適
既疑齊女之蟬夢幻堪驚且悞莊周之蝶已而別館淒
爾離宮寂然動蘭燭於殘照藹薰籠於夕烟蕭條而竹
換筠粉零落而苔侵翠鈿天上和風送神仙之二八

人間麗日迎桃李之三千美夫人昏主之宮出明君之
關千門而綺煥裳錦九禁而雲銷鬢髮故宜其貝齒朱
唇歌太平之日月

鑄金為范蠡賦

以賢臣去國鑄金成狀為韻

鑄以表德金惟象賢始規模之卓爾俄冠冕以昭然任
銅墨之資焉能接武縱銀黃之貴未敢差肩昔范蠡
以勁卒平吳扁舟去國勾踐重念成功乃嘉丕績兼金
非貴將酌霸越之功良冶大開遂展鑄顏之力俄而威
儀可象鎔範斯陳西南之美寶方集卿相之英姿乍振
敵國以亡似避鑠金之口洪鑪委質翻從作礪之臣是
何爍彼真姿宛成奇狀對烏喙之英主映稽山之遠嶂
威儀可仰似當麟趾之時軒陛非遙如履燕臺之上蓋
以辭賞逃名嘉猷大成聳千官之耳目見三品之精英
儼端委之儀不慚銅臭處薦紳之列獨有金聲道契陶
鎔功符鼓鑄交光而鵲印垂組晃色而金盤擎露倘滿
籛之可貴自契韋賢苟一諾之非輕何慚季布是知剛

以表義義以象金觀巧冶之非遠察常念兮則深我武
載揚既示能剛之力大名難掩足彰為義之心美夫佐
命爰來成功而去閱形容而國寶堪仰讀史策而嘉名
益著始知文種之徒曾無遠慮

欽定四庫全書

文莊集卷二十四

宋 夏竦 撰

頌

景德五頌序

景德紀號也五頌美盛德形容之有五也王道興而頌
聲作士大夫之職也臣文淺辭陋職卑任遠不能盡得
朝廷盛事發為詠歌但少叙萬分之一式抒區區若以
國家成功告於神明荐之清廟臣工之上無媿辭焉謹

昧死序進如左

平邊頌 并序

臣聞四裔交侵薦食邊境為日久矣虞夏有山戎獯鬻之患成周有昆夷獫狁之難趙築長城以設險秦驅諸戎而出塞逮漢而下種類滋蕃和之以親而不庭懷之以文而不至要之以盟而無信餌之以貨而無厭疆臣以是發憤王者於焉赫怒至有空天下以事外夷奪來耜而授干盾四海將服而中原隨弊英主所以疚心良士所以極慮故漢武震威而損費光武惜費而損威李牧知保塞而不議其久奉春約和親而不議其叛賈誼陳五餌而不議其貪鼂錯論三技而不議其獷班固述懷禦而不議其彊侯應計也戍而不議其守誠哉嚴尤所謂無上策者也魏晉以降羌戎滑亂或結以姻婭抗之鋒鏑謀鮮者而聞者衆偏議多而勝算寡其間羈禦之制無復可從五代哀亂跳梁邊陲上天有融騰我聖祖疏鑿山河重造日月東臣九夷南庭百蠻武功文德二帝

相繼蠶爾戎羯首鼠西北討之則後服赦之則先叛數
十年間兵用未戢我皇帝天地其德日月其明風雨其
教雷霆其威陰陽其功造化其智無窮兵之忿無和
親之弱無飛芻輦穀之勞無迎降畜附之費廟謀動於
自然成算出於無際戎后請命羗豪獻誓北至西歸願
脩蕃衛臣百世之所叛亂服曠代之所獷戾臣下不知
其畧億兆不知其功巍巍乎蕩蕩乎我皇帝之有天下也
得禦戎之上策神而化之聖德無名臣謹按春秋僖公
四年經書楚屈完來盟於師盟於召陵曷為再言盟仲
尼喜服夷狄夫服一荆楚聖人喜之况我平三邊降二
敵者哉臣再拜喜忭謹獻頌曰

帝宗經營戎車四征東南易王西北難庭遷寇河隴戍
螿幽并我澤流春我威飛霆去如鳥獸驅若蚤蝨國既
底定塞枕棲兵吾皇柔克順帝之靈元造不測聖功無
形戎后款塞羗種乞盟稟我正朔受我官名弓橐象弭
矛偃重英投烽榆塞甄忝戎亭六合無雲纖塵不驚日

月所到皆被皇明環海為池倚天為城恢恢聖謀洋洋
頌聲有皇上帝惟德是成莫憂匪國我國既寧莫患匪
邊我邊既平欽哉欽哉永萬千齡

廣文頌并序

景德二年夏六月頌勸學詔於天下秋九月甲寅詔張
六科取士廣文德而勵儒業也臣聞聖人仰觀乎天俯
察乎地知文之可以經上下緯邦國正禮樂移風俗於
是乎修經籍為文之器立庠序為文之館植政化之本
導仁義之源跬步之間失之則亂故先王謹教勸學博
文訓士以取輔相以濟功業其道充者其文盛其政息
者其章缺蓋文者匝天下之器也四代而降文物之制
莫茂於漢莫盛於唐自昔周道不融青衿起剌七雄分
競干戈日尋道堙揚墨辭逸談說斯文中否而漢氏開
之洎三國鼎峙六朝南渡義駭僂釋辭放輕麗吾道將
微而唐氏隆之然則漢乘秦弊去聖犹近學欲博而益
專文欲華而自負其取士也故有賢良有道孝茂之舉

革隋命去聖踰遠學欲一而滋蔓文欲典而更麗其取士也故有進士科目明經之選夫漢之得人莫盛於策問唐之取材莫精於辭賦雖文質殊軌而取舍齊致公卿之材忠說之臣論議之官博古之士考之二史世不乏人故制度可遵歷祚皆永暨五代宿兵漢唐之制廢缺垂盡天啟有宋拯我儒德曾不崇朝文明天下我皇帝親幹文柄指麾萬國變為政教發為號令景德之間坐致太平蠻夷柔服天下歸心邊城夜開五穀被野由是益重儒術專用文章增漢之科式求典則勅唐之學以博文辭傳曰周監於二代郁郁乎文哉雖使漢文武兩帝唐太明二宗生於今日觀陛下好文之德將震駭而不暇豈敢自量其輕重哉臣叨預薦紳竊聞公議皆願復三朝之禮定封禪之制告文德之成功終薦神之厚意具瞻聖德不勝區區謹昧死上廣文頌其辭云

星辰日月麗我天則山川卉木賁我坤德禮樂詩書經我邦國三儀同文羣生茂植故我皇帝道以文麗吐耀

象天含章法地典故周旋朝廷之制儒雅雍容卿相之位既和三靈既庭四方乃監虞夏式規漢唐高張六科制詔萬邦敦勸儒學親策賢良景德之盛斯文有慶勵我多士遂及百姓巷隘褒衣塗歌雅詠學館漸海儒宮越境天下文明洋洋頌聲方策鱗萃禮樂教興翰墨如雲環佩盈庭濟濟多士吾皇以寧多士寧矣納忠獻議封禪未行三雍尚廢願及盛時超行古制帝曰俞哉寔朕之意

朝陵頌 并序

景德四年春二月皇帝朝陵於鞏書禮也古者因山為陵秦始置寢漢氏因而制其禮以晦望伏臘四時上食歲正月天子率公卿百官諸侯王以朝廣孝德而盡思慕也三代既往漢氏文明專以儒臣表正邦憲千歲之下垂為舊章自非萬國底定天子仁孝則不克行之能行其禮者必有大功茂德格於上下靈澤慶賜流於百姓鴻徽盛事紀於史策聲詩雅頌播於絃歌足使昭感

上穹光被海外動植所生無不茂育人跡所到無不臣服蓋孝之為德也際天地而感萬物者也我崇文廣武聖明不孝皇帝陛下聖性純孝加于億兆郊祀燔瘞以祇事天地春秋蒸嘗以昭奉寢廟俎豆犧牲躬自執獻盡誠極孝冠於往初景德中天下無事夷狄內附塵清九圍通驛萬里吾皇帝親丕丕之基念祖考之業履霜露以悽愴感春雨而怵惕孝思之心不捨晨夕乃登用漢典制誥有司庀庫輅簡環衛幸鞏洛朝陵寢崇牲牲之禮備韶武之樂六官畢從四夷陪位錫鑿珩珮震響郊圻梯航寶玉駿奔川陸自古廟會祭享之盛未之有也足以冠虞舜之德光炎漢之典昭假鬼神炳煥方策升聞於天則日月星辰雪霜風雨無有不時降感於地則山川江河昆蟲草木無有失所大哉孝德之盛也不可得而名之遠郡小臣以文受祿無以自效謹獻頌曰皇帝丕顯孝治四國乃祖有功乃宗有德功業具溥惟帝太祖虔劉巨盜建邦啟土德昭且融惟帝太宗表正

大中進賢孫庸兩朝厭世龍歸波逝墓我弓劍因山鞏
地春日熙熙惟皇孝思乃朝陵寢于洛之畿左肅倚天
旂旄歲蕤諸侯扈蹕珮玉參差和鑿鋸鋸行道遲遲瞻
望松柏帝心傷悲亦既至止必芬孝享吉蠲犧象馨香
鬱鬯動止心企音容目想祖考來格歆我追養樂以迎
來哀以送往命我孝嗣受天靈貺河洛之濱太和氤氲
慶澤流春皇風感人翠華旋歸車服振振采雖舊邦景
命惟新孝德不匱永錫下民下民親親萬物皆醇歌頌
騰文竹帛流芬孝哉皇哉子子孫孫

廣農頌并序

景德三年春正月庚戌詔頌農田勅於天下二月癸未
詔郡國領勸農事崇化源而廣農業也臣聞聖人無土
不王無民不君有土地則王業興有人民則君道立故
先王之建國也土欲廣而不用隙民欲衆而不用惰謂
地之不闢非吾土也人之不農非吾民也乃為閭里室
家以蕃其生為畎澮封畛以理其田為耒耜錢鏹以庀

其器為歷象氣候以授其時立經制以御之設官司以
教之均高賈衡虞之稅正車馬甲兵之賦於是乎仁義
禮樂有所加賞罰號令有所用三代通制建中經遠民
以里居地以井受暨秦開阡陌農戰相乘漢制名田并
兼不息舊章缺而仁政墜經界慢而訟競起沒革而下
古之制度不可復矣其政何哉蓋三季已還五代而上
有天下者或不知天下以地為基以農為本以食為源
以教為器當其撥平禍亂經始四國則衽金華簡車
馬計懷柔謙聚歛賞勳舊治城邑暨邊陲既寧寓縣既
平功業既成庫既盈則思恣華夏以自奉驅億兆以從
欲有患邊幅未濶威武未震則轉芻粟事夷狄有患歲
月易逝容髮易朽則招方士求神僊有患登覽未遠行
樂未極則增臺榭麗宮室有患嬪御未廣歌無未工則
漁聲色送伎藝有患校獵未快馳騁未捷則廣苑囿具
畢弋有患延幸未徧游賞未普則修馳道飛清蹕其間
自非負天啟神授之資有聖文靈武之德者則不能訓

稼穡務儲峙捨派而趨源去末而從本致天下太康家
給人足者也我國家荷二聖基業用三王禮樂足食訓
農克立治本吾皇龍飛春秋鼎盛勵精百度旁求黎獻
謂守文艱如創業承平難如治亂深鑒前世專行王道
羈縻四夷而重兵革漁獵賢傷而藏網罟覘六藝虛臺
館聽道德定聖樂功業之大則成康文景無或比隆河
山之遠則秦漢隋唐不能齊盛菽麥流行而紅腐玉帛
充牣而露積陛下尚宸居減麗御膳輟聲宵衣紫庭清
問多士舉三王之故寔修八世之隆典以為擇循吏守
郡國撫百姓善則善矣而未專也於是授之使領設為
職司所以循名而責寔也頒憲令經田疇勸耕殖至則
至矣而未一也於是編其制度勒為科條所以建中而
示法也循名責寔則官不曠建中示法則民不疑詔下
之日鬼神稱慶太平之風旋踵可待不終日而爭訟息
未踰時而溥鹵關九圍之內一歲之間衣食足而倉廩
寔仁義行而刑罰措天哉炎宋功德陛下教化垂億萬

世與天無窮臣生逢聖明叨觀盛事謹昧死上廣農頌
其辭曰

皇哉惟聖躬提天柄億兆歸心三靈洽慶廣我田事肇
修稼政乃置官名乃頒號令號令維何分條建規恩斯
懋斯流冗攸歸官名維何啟職庀司訓之導之播種惟
時民曰勤止服田力穡晝爾于耕宵爾無斃千耦偕飛
百穀咸殖既藝淳鹵越經封洫官曰洫止糾力勸能瘳
我殘罅疏我溝塍乃能通灌溉爰相邱陵汙萊以闢游惰
用懲赫赫聖謀有作咸覩畎澮四溟井疆九土沃野萬
里縱橫其畝擁耒成林灑沆降雨陽春如膏原隰如鱗
我稼既華六合生雲稍梁黍稷萬井龍文同我婦子或
耨或耘八月其穫乃登爾稼滯穗棲原餘糧廩野盈溢
京庾流行方夏式歌且謠土金同價百姓足矣君孰不
足三百之困九年之畜八蜡既通五禮咸穆歲財於民
所寶惟穀君哉君哉樂事訓農炎帝之教后稷之功方
我王度明而未融臣之頌之永矣無窮

周伯星頌并序

景德三年夏四月周伯星見書瑞應也臣聞日月星辰天之經也國之紀也日以象君月以象臣星以象民炎君德不傾不側仁義文武昭於上禮樂刑政臨於下得至陽之體於是乎有日瑞昭昭臣道不僭不忒忠信方正積於內訃謨獻替發于外得至陰之休於是乎有月瑞君之靈如日之升臣之英如月之征照臨下土六合文明賞罰不濫兵革不試災盛不害災沴不作生民熙熙家給戶足鑿井而飲耕田而食蒙帝之力生育蕃息於是乎上發於天厥有星瑞書云庶民惟星又云天聰明自我民聰明蓋星瑞之謂也國家受天成命五十年間法令寬大元元仁厚自克殄并土戎衣不再年穀荐登俊又旅進我崇文廣武聖明仁孝皇帝陛下虔奉神器稽用故寔光昭百度緝熙禮樂刑賞以御中外慈儉以率左右羣臣有羔羊之潔公族懷麟趾之信郡國州縣各揚其職景德中匈奴謹守要約不敢犯邊塞無宿

兵人用休息齊民之家不憂歲時食飫雞豚衣厚繒纊
耕有餘器廩有滯粟扶老携幼塗歌里詠大哉此時上
無失德下無遺政君君臣臣萬國交慶雖日瑞于晝月
瑞於夜魯不足表吾皇之明朝廷之盛於是乎有周伯
之象告生民之瑞見於首夏國家火德之應也躔于角
亢人君壽考之象也天意若曰令陛下壽考萬年平章
百姓隆火德之光明昭上帝之休命願陛下欽之念之
雖休勿休不數年間圖書寶玉雪霜風雨山川草木盡
為嘉瑞史不絕書故曰陽感天不終日蓋天之於陛下
枕父子之事也臣叨列縉紳仰觀靈祉知在今日斯文有
光謹再拜上周伯星頌曰

帝承三聖功成治定昭融景命承天慶兮周伯焯焯經
宵耀雲何德之純感星辰兮吾君恭讓德音敷暢蓋天
垂象介景貺兮我國文明儒風炳靈惟德降禎發鴻英
兮東南委照蒼龍隱曜赫天表光帝道兮考彼典章
知我天子享嘉瑞兮上可紀官下可建元法象星躔假

於天兮昭我炎宋永御星統微臣作頌歌日用兮

大中祥符頌

崇文廣武聖明仁孝皇帝陛下即位之十二年春正月
乙丑大中祥符三篇降於左承天門書瑞應也以日者
謹天命也以地者大靈貺也臣聞庖犧氏作結繩而治
天將有命易以書契龍馬負圖出於河聖人觀之退而
畫八卦兩儀四象吉凶晦吝無所遁其形矣百官以治
萬民以察後世帝王言大政者自庖犧氏始夏后氏作
繇陁洪水天將有命莫厥山川神龜負書出於洛聖人
獲之退而叙九疇五行八政休咎咸福無所隱其奧矣
舜倫攸叙水土俾又後世帝王言大功者自夏后氏始
炎宋氏作三聖致治天將有命昭厥中庸神人奉符降
於汴聖人受之退而啟三篇清靜簡易道德刑政無所
蔽其秘矣四夷率服億兆可封後嗣帝王言大中者自
我皇帝始大哉三氏之德與天齊盛皆獲符書並垂典
訓混而言之則同參而言之則異同者事也異者道也

伏犧以文物未作朝章汨亂天授以圖始啟其政夏后
 以水災未又下民昏墊天授以書始啟其功炎來以太
 平方至帝道有融天授以符爰建其中是則政也功也
 中也同為至道考其異則中也可以兼於政功矣圖也
 書也符也同為嘉瑞考其異則符也可以冠於圖矣河
 也洛也汴也同為靈川考其異則汴也可以加於河洛
 矣犧也禹也采也同為上聖考其異則采也可以跨於
 犧夏也故八卦之始畫也其象隱晦仲尼讚之乃著於
 經九疇之類也其文草昧箕子衍之乃列於典我大中
 三篇則不其然宛有章句政教出為天作之天述之
 授我皇帝以七六籍以錫明命為萬代法故天不敢畀
 龍馬後神龜負於河荐於洛乃命使者奉而降汴魏闕之
 下禁門之上天之恭我皇家且異於古也使仲尼復
 生箕子不死在於今日舞之蹈之猶且不暇詎敢讚之
 於經而衍之於典者哉於戲千祀之衰也天道何遠乎
 一朝之盛也天道何邇乎蓋我國家撥五代之亂奄有

神器太祖靈武經始於前太宗文明光被於後廷四海
訾言萬靈集異馘蜀裂廣屠弁不二十年寓縣穆清授聖
三禁以致太平今上居以天休化以神聲陰陽有愆伏
而聖功無闕日月有盈昃而皇明不息故強敵北面而
受封羌豪泥首而內附罷河西之戍放榆關之馬京洛
之間王氣聚為宮闕良耜不試嘉穀生於田野齧齕舞
詠於道路耆壽沐浴於膏澤桴鼓在庭而罷擊桃李垂
路而不攀阡陌服車馬閭閻享梁肉當是時天雖秘圖
籙受符命其可得乎然則符瑞之至以五行而言皆有
象也臣以列為三章者陽數也封黃帛者中色也時以
春者仁降承天門者承天嘉號也門聽政之象也天意
若曰王者休陽德御中道行至仁則有圖書之瑞應之
以承天之祐而聽萬國之政也臣幼學史氏誦春秋大
義以為東周不競瑞不當至先聖削而不書退有鳳鳥
河圖之嘆繫自獲麟距國初建隆歷二有有四甲子矣
賢材代謝而符命不至臣也何幸逢時遇主行年二十

有四而叨觀不世之瑞上比聖賢自慶多矣故身在滄海之上心馳象魏之下恨無文辭以廣稱述謹昧死望闕再拜頌曰

惟聖有功格於天日月星辰炳其靈為惟聖人有道道格於地山川草木耀其祥矣炎宋氏作三聖承平休功無形至道無名莫高匪天不足炳其靈莫厚匪地不足耀其禎三正百神同開奧秘取圖河洛裁文五緯爰作受命王者之瑞景德之盛奉之而至先斯吉日神告有密僊服降庭奔精照室蒼龍在申太簇歌春素月哉魄朱羲始晨皇帝受之於承天門宿衛咸觀玉帛駿奔爰有大夫進牘而言臣知天意敢告於君億兆歡心宗廟遐福有感於帝化為寶籙文武流光禮樂騰芬上達於天化為寶文表我皇家大中建國昭我天子大中立極三篇未至中道以崇三篇既至中德益隆建元青災華裔可封慶賜周旋圖圖虛空一之日荐於寢廟昭穆增耀二之日告於朝廷雅頌騰敷三之日達於九土里巷

賡歌鳥獸率舞四之日閭於八荒投戈右袵九譯來王
可以象功制禮修樂三五之事一旦而作可以告成登
封降禪八九之功一朝而見史氏書之歲於太室垂厥
子孫遐見茂寔太師歌之傳於樂府荐厥岱郊永告嘉
祐素王聖哲見嘆河圖臣之庸昧獲覩祥符歌詠功德
職士大夫稽首獻頌願繼典謨

欽定四庫全書

文莊集卷二十五

銘

潁州蓮華漏銘

夫迎日推策帝鴻之憲天也治歷明時成湯之應人也
日月有發歛晝夜有增減非在璿不能測盈縮非運儀
不能定昏明以是歷數起焉漏刻生焉晝參乎晷景夜
驗乎次舍雖上天之運不能逃矣舜史日永星火者晝

漏多也日短星昴者晝漏少也周官有以火爨鬲之制
齊詩有折柳樊圃之譏由是觀之挈壺之設其來尚矣
漢承周秦圖籍最備其令甲第六著常符漏品二十四
氣各為二箭刻日所在并黃道去極晷景刻數昏明中
星於其下班之訂吏自茲厥後踵事增華逮施於李蘭
始變古法權器程水以準時刻唐之諸道率循此制至
今器有存者而莫能施用唯司天官漏迄今用之參以
中星因時升降而置箭之制世不復傳上躬至聖之姿
極攸縱之美稽古典學勵精百度討論希闕講求禮術
天聖中有今龍圖閣直學士給事中燕君肅始考七經
戴籍作蓮華漏於梓潼來獻闕下其制為四分之壺參
差置水器于上刻木為四分之箭箭四觚面二十五刻
刻六十分四面百刻總六千分以效日凡四十八箭一
氣一易鑄金蓮承箭銅烏引水下注金蓮浮箭而上有
司唯謹視而易之行漏之始又依周官水地置臬之法
考二交之景得午時四刻一千分為五正南北景中以

起漏為時予脩職樞府弗獲熟視君未幾作藩青社建
茲漏於白樓予出守汝陰亟往代君因得細睹其制精
妙參神景祐中君復廢承明求刺於潁予亦內徙睢陽封
圻接畛慶問時通因請更為潁漏以廣其傳君由是
再考晷度以梓潼在南北古法晝增一刻夜損一刻青
社稍北夜損亦如之晝增三刻夜損三刻潁處梓青之
間晝增二刻夜損亦如之仍作屋秘漏得天愈密予舊
謙史局粗親此學以為乾體左旋七曜運舍皆動物也
赤道橫帶黃道斜截復有進退夫物動而有進退者勢
久必差故昔賢制術以天度乘晝夜漏減三百而一為
定度以戒天度以為明加正度以為昏所以追晷景之
實防節氣之差然三百歲半厯改憲而異人出為今燕
君其當之乎夫六藝羣書唯天文數術探頤索隱鉤深
致遠最為難明若心所不達雖通人前識詎測其方而
世之俗儒或以為非為紳先生之所稱道何其誤歟仲
尼作春秋每于朔閏發文以宣明厯數此聖人之深意

也書不云乎敬授人時禮不云乎百度得數而有常後
之觀者幸無忽焉其漏志一篇亦刊諸左方期於不朽
云爾銘曰

極星建中黃道營外度有邇遐時有明晦聖人觀象古
史詒則孔壺為漏浮箭為刻資始巧厯稽合小餘重黎
是司羲和是圖秦氏遺法漢京垂制歷世彌文舊規加
麗玉虬吐水分灌兩壺金龍轉注下激衡渠天道可觀
神化無跡日運波澄氣分箭易原本脫四字都邑屢遷寂寥

罔詔世失其傳猶嗟燕君文學餘力博貫舊章肇新景
式象魏既登潼川既營建于青園作于頴廷五夜持宵
三商定夕杪忽無差升降靡息意侔造化數窮天地茫
茫有生孰參其知於鑠聖來世祚無疆刊此樂石永憲
萬方

瓊臺雙闕銘

瓊臺峩嶷左右如闕直上相等蘿交蔓結啟閑雲氣出
入日月干沅若綫羣峯如屑凌霄壓海吞吳跨越

石橋銘

山壤獻靈融結推功穹窿石梁飛雲架空垂流下激絕
岸旁通煙華溟濛矯矯翔龍朝日瞳矐蜿蜒騰虹願接
天孫以助登封

三井銘

石罅山半三井如鑿圓不可窺深不可度亂澗四人飛
流外落墮石不盈驕陽不涸冷激松檜碧混崖崿山靈
所衛神物攸托簫鼓一鳴雷雨間作

洛西銘

商祚不永帝辛失御百神受其媿褻生民墮於塗炭西
伯曷既脫美里之禍陰圖王業將欲以利易其心以德
勝其暴以為罷長夜之飲却靡靡之樂省其狗馬陋其
苑囿皆不足以警天下之缺望懷百姓之歡心乃獻洛
西之地請除炮烙之法紂許之夫以仁義而勝殘虐以
洛西而易天下萬民之心已歸於周而獨夫莫知之也吁
君殺而臣宥上歛而下施者鮮不易地而處矣使西伯

先堯舜之世修諸侯之德猶不暇况天子之事乎蓋飢者易哺寒者易衣凋弊之民易歸亂世之患易行為人君者其慎德歟君子曰牧野不能亡紂亡紂者炮烙也岐陽不能興周興周者洛西也有經其地者立碑以載辭修辭以達意庶千載之後知文王之心哉銘曰

獨夫驕矜牝鷄晨鳴炮烙之刑虐生靈兮文王翼翼憮然心戚獻我疆場去非辟兮紂得其地周得其義兆民之意知險易兮惟洛之右商禍之首諸侯心疚天絕受兮惟洛之西周德之基四海心歸天祚姬兮洛郊如砥周道如天德音不已垂千祀兮

秦東門銘

夫夏之亡也湯得之以仁故卜年四百商之亡也周得之以義故卜世三十周之亡也秦得之以力故敗不旋踵蓋嬴正以區區之秦闚關東暴師二十有六年而削平區夏分為郡縣為武之力亦其至矣奈何取之不道守之不以德信任胸臆慕於權勢峻文酷法樂於

誇大嘗經東海上朐縣界中立石為秦東門以表其功業一旦宮車晏出神器失守匹夫大呼社稷綫絕為國之弊一至於此孟子有言曰域民不以封疆之界固國不以山谿之險威天下不以兵革之利誠為天下之道哉後有人經其地而為銘以識其事銘曰

六王伏劍秦道益昏丁男北戍雲罕東巡經於上朐薄於海濱立石峩為秦東門刑政不殘鬼神不擾秦無東門秦不為小兵革既喪禮樂既壞秦有東門秦不為大天歷秦荒禍起蕭牆函谷不守豈暇四方東門之中天設局鑄納漢以興閉秦以滅我經其所塊然遺址刻此堅石以識秦罪

焚書坑銘

秦焚經籍尚法令人知其禍而未知其福為夫舜死而陟方則禪受之道缺有夏多罪則篡弑之風起蓋受天命觀人事而作故君子不謂之暴而嬴氏以區區之秦闕觀閩東剝兵剝糧峻刑刻法幸六諸侯之弊盜據神

器累世之禍積於宗廟北民之怨盈於城野炎漢之聖
伏於豐沛是時苟能右詩書敦禮樂修人文而黜吏議
祿冠纓之士行帝王之術雖累世之禍不得發矣北民
之怨不得泄矣炎漢之聖不得章矣而秦反枕干楯衽
金革貴刑名而害仁義官甲冑之夫馳戰霸之塗故宗
廟之禍得以發矣城野之怨得以泄矣豐沛之聖得以
章矣夫是坑也焚於斯禍於斯福於斯焚書也禍秦也
福漢也詩書不亡無以速秦禍也未有削平敵國分為
郡縣不數世社稷魚壞而不可救者也禮樂不墜無以
速漢福也未有起布衣提三尺不數載而大統畢集而
不可免者也蓋文之於國猶水火哉無一日之可暫去
也秦失天下也故禍之易也漢得天下也故福之易也
君子曰國之將亡文先亡矣未有守文而不能救亡者
也斯文之道如天地為如日月為爨之載之照之臨之
非可息也秦之焚書焚秦也文道非可焚也客有經其
所為碑以銘其事其辭云

詩書禮樂加於焚燎爛赫地維煙歛天表凝為灾星秦
 祚以天融為王氣漢德以北正棄秦祀非棄文德天禍
 秦毒非禍王國斯文何損如日月食道不可屈明不可
 息神契人合羸不血食原本脫文乃彫沸煙復為仁燼
 復為義大儒蜂午振鋒而起心攬神遂口傳天意皇皇
 六籍且經且緯赫若煙爛燦如烽燧斯文之聖因焚而
 試斯文之道因焚而熾俾我儒德後王之畏不敢侮慢
 以速禍戾原本脫吾知可貴秦滅漢王是名銘誌

補封狼居胥山銘

予嘗讀漢書至武帝即位之二十四載將軍去病出塞
 捕敵封狼居胥山而還紀傳皆闕其銘遂為銘而補之云
 維漢元狩四年上以去年匈奴寇我北境至於定襄分
 命諸將耀武窮絕奉行天討驃騎將軍冠軍候去病總
 十萬衆出右北平甲冑鈇鉞遠旆天怨禮信為器行列
 畢整精誠貫白日銳氣凌秋霜金鼓相應有不可辱之
 聲旗物相望有不可奪之色矛旄雲霧號令風動約輕

齋絕大幕越二千里既俘張渠乃轡車耆追左方之兵
歷度難侯濟弓廬奇兵翼張犄角相向取旂鼓麇酋師
執訊獲醜踰七萬級掃平區落推揚帝威南轅反旆歷
於山川遂禪姑衍臨瀚海封狼居胥山式表漢德從事
承命是為之銘銘曰征朔幕兮振元戎犁王庭兮翦元
兇車騎旋兮氛祲空刻隆石兮山之峯永萬年兮漢之
崇

女懷清臺銘

女懷清臺秦所築也寡婦清米丹擅利以財自衛始皇
客之為之築臺于巴蜀夫婦以客則非典臺以旌則非
禮蓋王者之客有二曰二王後正三統也曰異域正朔
之所不加也國家之旌有四曰貞曰孝以侑民也曰功
曰德以礪臣也而婦越閨戶預外事是非貞也圖貨殖
忘盥饋是非孝也採丹石棄織紉是非功也抗君禮乖
婦儀是非德也客之不足勸貞孝適足教民以慢上旌
之不足崇功德適足化民以末作秦嬴之心何以言哉

史遷曰豈非富也夫富而吝之富而旌之則孤老窮瘁之民受殘於并兼之室貞介孝義之妻仰首於豪戾之婦語不云乎放於利則民多怨於戲古之致民於富壽者禁末事戒游惰丹漆金錫之類非貢不入於太府骨革毛羽之物非時不登於器用者徭役薄賦歛循天時廣地利君籍田以勸耕后親蚕以勸織故民倉廩寔矣衣食給矣寔則富矣富則樂矣樂則和矣和則壽矣哀哉秦之為政也反是貴寶貨而賤耕織靡編戶而喜商賈婦非所表而表之表貪競也臺非所築而築之築禍亂也貪競起而王業衰禍亂長而宗廟墜秦是用亡臺之罪也各有延想往事勒銘遺基思有以戒之也銘曰章羊魚角牝雞無晨陰不可唱以已狗人戾哉寡婦鈞禮亡秦築臺於蜀以惑下民崇臺昂昂秦女所亡不守帷薄棄夫擅陽崇臺嶷嶷秦民所息怠棄隴畝採採丹石蚕絕桑死女不務織土乾種腐民不務食婉婉盟饋秦女為仇服田力穡秦民為讎貨殖是積玉石是求以要

旌表以容冕旒茲臺未成秦毒已盈茲臺未傾秦廟已
平吾恐蜀民以秦為明吾恐蜀女以婦為貞棄德逐利
寢潤風行故撫秦罪荒址是銘

欽定四庫全書

文莊集卷二十六

宋 夏竦 撰

碑銘

傳法院碑銘

太宗至仁應道神功聖德文武睿烈大明廣孝皇帝以
太平興國七年六月建傳法院於太平興國寺今上體
天道法仁明孝德皇帝以景祐二年六月特詔史官追
頌先烈史臣某拜手颺言曰唐氏中微五代多故三辰

昏侵九服煨燼虎爭龍戰糜沸雲擾我國家題五精之
期起千歲之統祛天地之否隔拯夷夏之塗炭翦寇劇
以靖搆亂誅僭劇以遏橫驚太宗皇帝張天弧順斗極
驅除戎狄駕馭髦傑制禮樂於已壞振文武於將墜奉
藝祖以造大業由太弟以纂鴻緒歸馬論道授千講藝
爨露所及轍迹所到罔不辟皇衢剗霸軌一文軫齊量
衡者焉洎乎六幕謚寧中宸閒宴披蠹簡訪幽經觀天
人之交探神明之奧補綴漏遺講求希濶朝夕之議
必稽於典冊小大之政咸本乎根底嘗謂佛法之至也
百王不易歷世彌盛中原之區宇絕域之種落戶諷其
書家圖其像一睇宰堵一嗅簷蔔或因受以悟法或睹
相以趨善感照以應群動廣大以攝萬有裨德教省威
戮其未尚矣先朝乾德中臨遣僧行動等一百五十有
七人各賜裝錢訪經西域今繼有還者嗟其翻譯之廢
載祀二百非國家削平多壘奄宅四海通道夷貉暨聲
蔥雪大事因緣疇能復之會廊時守吏王龜從上中天

竺印度僧法天梵學比丘法進所譯經又北天竺三藏
天息災與其受具母弟施護各持梵夾來獻符帝雅意
天寔啟之乃遣內侍鄭守鈞肇營茲館賜息災法天等
宣譯命光祿卿湯悅等潤文法進等筆受綴文義學必
芻慧達等證義高品王文壽等監譯由是憲前軌稽秘
藏依金剛界陀種子壇書字源布聖位三成藻飾四事
莊嚴三藏主譯於壇北梵僧證梵義證梵文義學僧證
義刊定華字於左右潤文東南以資筆削監譯西南以
肅儀律新經既成制殫臨幸賚物有品詔賜金額歲給
殮錢一億六十萬度僧十有一人翻譯之制大脩於茲
御製三藏聖教序以冠經首息災賜名法賢又詔擇京
寺童子得惟淨等五十人令肄梵學每大電紀辰貝多
啟譯經成奏御召對賜坐進見甚寵觀者榮之真廟紹
文鴻徽累盛舞羽而清河右丹駕而羈幕北鑿旗駐於
茲館篚幣班於法席泊乎勒園封禪梁陟上儀交舉盛
節咸備擁九清之嘉祐訪三空之真諦祇適先訓布昭

睿藻作聖教序以賜之又詔參知政事趙安仁等并所
降制詔賜名大中祥符法寶錄復以宰臣丁謂王欽若
充使以寵重焉聖上慎徽祖服光啟宗範長養容粟極
兩儀之大德睿哲廣運總列辟之能事盡美乎萬幾宣
精乎三教悟然燈之授記當彌勒之囑累以無上之知
覺建大中之教化述三寶贊以冠藏錄衆聖歡蹈羣生
依怙雨花芬都金光照爛恩深歸救之本理極名言之
表無量功德非思議之可及也自興國壬午距今乙亥
五十四載寵靈積累妙因殊勝有若今右僕射同中書
門下平章事呂夷簡以師臣上衮博達空理奉制兼使
今參知政事尚書吏部侍郎宋綬以宏材碩德了悟真
際被詔潤文有若故樞密使同中書門下平章事王曙
參知政事張洎趙安仁樞密副使楊礪翰林學士承旨
晁迥李維翰林學士朱昂梁周翰楊億皆以學通儒釋
繼司譯潤上哲清流盡在茲矣翻宣表率則有三藏五
人皆賜朝散階累遷試光祿卿始法賢次法天次施護

並殺帝利氏深窮秘密博通華竺功成頓化卽禮尤異
又次法護比天竺橋尸迦氏始隸毗居聿修禪誦先朝
以期至自西遐該明法要令嗣譯度次曰惟淨故吳王
季煜之犹子七歲依師選習梵業真皇以其不游西度
精曉貝文特命主譯天聖中法護請還身毒惟淨求往
闕塞累表不允今皆際會昌期宣隆教典者焉其監譯
內侍則自文壽至今內藏庫內常侍陳文一御藥院入
內供奉官閻士良印經院入內高品朱若水十有七人
皆簡擢恭恪以幹院事其筆受綴文證義等僧則自法
進至今文一法凝鑒深慧濤潛政清漏善初義崇慧素
存行及梵學僧文涉道隆慧燈七十有九人皆妙擇行
業以塞朝選其貢經五印度僧則自法軍至法稱八十
人取經還華僧則自辭潮至棲秘一百三十有八人皆
克遂至願贊此大緣寵賚之數咸有差次其貢獻并內
出梵經無慮一千四百二十八夾祕之院閣譯成經論
凡五百六十四卷續於藏室娑婆之界以語言文字作

佛事

原本缺

本體貌丞相寵教尊異其誕辰翻譯瑞場啟罷

並命兩府銜弼傳香賜會著為永式夷簡等進詩稱謝
有詔刊石譯館之榮於斯為盛說者云譯者釋也交釋
華梵對傳句讀辨佉樓之筆簡韋陀之辭本政因以建
之繇雜句以文之廣陰入之津梁續癡冥之燈炬宣我
象教功孰大焉然而擬於法者空幾於真者靜染空尚
垢知靜犹障若夫遺照覺度禪定應現無方圓明具足
者豈有髣髴於其間也哉但以千覺度人始自言語八
藏垂教必假文翰馮林示寂鷲嶺罷談五百年中皆稱
正法三十四字廣衍右行充溢諸天靡迤東土非傳譯
無以達華夏拾潤色無以足言志鑿五蘊之牖破三毒
之網塞顛倒之塗決苦惱之海俾衆生竭愛流灌燬宅
味甘露以靖涼大士悟始覺證法身護神通而遊戲其
六度之本原乎萬行之因地乎宜固諦方言練橫字審
緣起正思惟惟貫穿宗極以了密義涉獵蒼雅以定華文
備而不繁直而不略訶四病之微細拂二見之邪執瀆之

海墨則諸佛下觀詠以潮音則百靈潛聽使廣叔之下
知朝家崇建之美歎聖上尊嚮之仁不其偉歟臣早遊
史閣常預譯場終以鈍根求補外職地如亭歷有生之
累猶多筆若須彌衆妙之門難盡上勤哀舊物俾圖懿
錄謹奉宸旨靡敢固辭議者以為聖上之建斯銘也昭
貽厥之謀周文之追孝也尚記事之美陶唐之有文也
光大度門能仁之悲心也守護正法有帝之鴻誓也宣
是四美垂厥無窮乎龍天降格神祇嘆譽永錫百祿大
庇中區皇哉煥乎謹銘曰

西方聖人萬化幽贊兆啟於周法至於漢森沉天祿古
經肇煥竚窳甘泉金人聳觀机緣合應夢寤通靈騰蘭
東入惜景西迎氎像可傳繪事初形具偈難解譯法肇
興魏晉洎唐正閏十九變梵成華翻傳代有篆隸兼諷
典墳旁究八備咸精三難盡剖正元以降國步多艱戎
笳沸路盜戟橫關悉曇罔學雷嶺誰攀法器幾墮慧命
將殫明明上穹啟我有宋盡殫殘暴並蘓愁痛神武拓

迹聖人垂統四絡同文五天底貢皇靈有赫法寶增光
精廬再考譯席重張半滿交顯疑偽兼詳六義垂範萬
頌裁章竺典歲臻華經日續液金賁字彫瑤麗軸思文
祖禰尊善導俗克昌厥後介爾景福皇帝孝思對越無
極碑頌休烈載刊金石鋪昭上乘博濟含識惟皇壽考
時萬時億

慈孝寺銘序

維天聖四載冬十二月洛苑副使入內內侍省押班江
德明被旨治故燕國英惠長公主第為佛寺賢福於真
宋文明武定章聖元孝皇帝始聖上以皇太后濬發鴻
誓祗迪淨因圖創美名永昭慈訓三事之臣相與進曰
陛下以聰哲廣運承燕翼之謀太后以寬仁勤儉膺顧
託之重垂簾訪對齋居聽政雨露均澤榮悴畢沾日月
並明忠邪洞判陽郊再卜歲歷五頌六幕晏清百嘉樹
育此太后慈至以佑嗣聖景貺博臨陛下至孝以事母
儀黎苗歡服在昔名寺方冊具焉或以紀年或以盛德

今願以慈孝為名庶稱道於無窮暉映於前代有制可
之仍命近臣銘於樂石臣聞東漢已還有天下者繼體
承基尊祖親禰黃流玉璜觀盥之享嚴高燎清壇外宥
之容備屬象餘烈顧慕遺恩奉先之典有終欲報之哀
無極或以佛國追福或以釋像荐靈旁行不流厥惟舊
矣唐氏中微五代短祚寇劇搖亂羣雄紛擾載祀踰於
二百歷世幾乎三卜文輝昏侵山川圯裂空廬生荆棘
郭郭成煨塵大塊之載欲空下民之命垂盡我國家天
合應祖宗重光並翦鯨鯢丹造幾夏勝殘去殺解百
王之弊紐題期立象擁五精之王氣憲洪範順乾則置
國以建永圖剗霸軌拓皇衢納民以遵大道功有震疊
焯耀格天光表而太山之高未增德有旁魄曼羨蒸雲
潤海而梁父之基未附上帝儲蕃祉而有待先聖膺寶
命而惟新其宅藩房踐儲却則三雞問寢四時者膳周
文之孝德也尸正京轂寵綏都畿有虞之歷試也其步
天階御神器則攸縱多能宣進道藝陶唐之文思也躬

案六師外攘夷狄成湯之聖武也大哉以日躋之美承
天贊之業仁經之義緯之根本於道德粉飾乎禮樂信
以來遠忿鷙之兵寢虛以受人鯁亮之臣進萬景以之
昭晰元化以之網緼包舉大寧參侔遂始故能延颺駕席
蘿圖萃坤珍輯天瑞紀官立制克稱乎神物升中降禪
不顯於上儀郊丘頌祇曲里尊道秩無文以拜貺篆名
山而紀迹均大賚賜明宥復太素宣至和子黎庶之恩
豐賓萬靈之禮洽方將杖筴館齋大廷而思帝所以甚
歡厭天下之為累撤琴瑟而弗憚倦與馬而罷遊聖人
入侍興居冠帶不褫太后親嘗藥石夙夜必躬靡愛牲
牲徧走羣望載罄圭璧並植三壇屑瓊藥而無功許玉
靈而罔效於是祈竺乾之祕教拾泌水之名園行異有
瘳即程庶役靡獲夢齡之感終稽彤日之報弓遺髯斷
荆山之鼎空成鐘睥酒清鈞天之遊不返宇宙慘怛人
神震動六宮攀號萬國縞素皇帝起初載臨宸極章明百
庶履德包元以儀刑形乎風烈皇太后恭遺制保重熙

平決萬樞博照兼覽以對越乎威神以為能數帝者聖人善饗親者孝子乃緣先朝之意寢講昭事之文以真皇之受元符膺祕記層宙之顧懷也始嚴安聖之殿于玉清之廷奉諄訓迪璿源六羽之監觀也繼作奉真之殿于靈景之館又以洛師吉壤執祖降靈有應天之院睢陽奧區王業資始有鴻慶之宮四範賅容並安寶宇盡漢祖龍顏之妙增聞元玉石之華皆衣冠是游旒宸如在荐櫻獻鮪馳傳相望濡露履霜因時增愴又以為禴祀極乎禮異幽贊之宜哀戚竭乎情無名助之禮乃復疇近職命有司申述緒言繼成曩志即鳳臺之餘趾建鹿苑之精廬因舊垣而不廣慮民居也鳩廢工而惟簡形人力也 祇直之園設像兼顧成之廟巖洞隱飾疑堂邑之山林讚唄傳聞變平陽之歌舞回廊四注飛觀相臨落斯干之雅章成春秋之遂事以五年冬十月詔擇練僧三十以奉重修置淨人二十有五以給灑掃設官守之局俾德明以董之議尊奉之制命太常以

參之先置禁中肖像文考是月壬申乃率邇臣戒宗室
導自天章之閣至於會慶之殿紫幄奏香空歌達旦翌
日羣侯晨謁百靈備從申命上公奉安於寺之崇真殿
緇黃先道儀衛清路幡華旗旆左右相見鐘磬笙簧前
後間作帷帟設次簪綬在廷太史侯辰攸司錯事言瞻
殿旁出於宸翰飛毫舉鳳拂素騰龍孝德聖能並煥茲
日甲戌上運法駕率公卿以奉馨荐越翌日太后御瑁
輿總嬪侍以獻令芳都人隘塗軒車擊鼓或鼓舞蹈德
或感泣懷思望帝鄉之雲慘淒共色聽魚山之梵讚嘆
相趨先帝付受之道光矣後聖恭事之禮至矣書所云
克篤前烈詩所云聿追來孝者也史官奉詔謹為銘曰
有宋赫赫兩宮明明慈昭神育孝總天經思文真皇悲
哀罔極魯館方虛給園斯闢斗城北望廣路東披采楹
叢倚紺瓦暈飛寶網羅空金繩表道滿月光明青蓮相
好有殿中峙寔奉先朝彫雲麗幄綺棟陵歆隆準如生
清輝若在祇荐馨香最聞馨效供帳咸具服御畢陳履

綦雖遠手澤猶新間館旁連藻局相屬廷有寓龍山多
疊玉嚴衛岑寂靈游往來雨華紛馥馳馭徘徊日監孝
思永賜純嘏時萬斯年在宥天下

大安塔碑銘

奉勅撰

有宋封禪後十祀建大安塔於左街護國禪院從尼居廣
慧大師妙善之請也今上寶元體天法道欽明聰武聖
神孝德皇帝在宥之十有七載詔史臣書其事從尼慈
懿福慧大師道堅之請也妙善長沙人姓胡字希聖母
既孕不如葷妙善勝衣志求事佛馬氏之亂略為姬侍
嘗被毀逢怒憂在叵測默誦普門名稱舍利見於額中
馬氏異而禮之國初宣徽使兼樞密副使李處耘南定
湘川得之郡即嘗以素誓未申斷穀謝病夢異人曰我
文殊也汝第食勝緣近矣明年處耘捐館遂依洛陽天
女寺剃髮受具往來兩京高行著聞太宗皇帝以椒塗
之舊錫以懿名被之華服大姓袁溥拾第起剝賜額妙
覺禪院令妙善主之自是肅禪儀練律學給瑜笱之會

演華嚴之說五陟岱山一汎四水皆中貴護送傳舍供
擬皇帝巡狩河朔刺血上疏璽書褒嘆是時萬安中參
恩愛衆異宸闈進見禮教踰等贈中書令中武公李繼
隆每以保阿尊事尤謹洎元符降格法御上封妙善即
朝日之郊卜布金之地諷甘露法品祈東禪靈祐帝意
嘉之賜名護國天禧元年湘東遼谷有鉅石重累數十
百文屹若浮圖昔隱今見詔遣使案視建寺度生以旌
其異妙善志往瞻禮有大弟子道堅以師臘既高衡陽
云遠懇留不已先事以聞翌日妙善請告南遊真宗曰汝
老矣何遽適遠如耒性海隨處現前儗有至誠皆可供養
妙善遂求建今塔特詔許之會江寧府長干塔成繪
圖未上促召妙善於護國將賜之道監在妙覺地近先
至方對稱旨受圖以歸首事創規寔始於此由是涓日
置臬肇基寶甃治金礮石作於地宮將祕莊獻明肅太
后所賜馱都遠妙善曩得佛骨會妙善示滅盡以塔事
鳴累道堅妙善享年七十有六尼夏五十有五宮闈

震嗟賻贈加品建坊立刹賜額寶勝以道堅兼主之道
堅盡禮蒼皴入謝局禁且陳妙善遺誓云此塔今世不
成未生願就先帝惻然賜以潛邸珍玩三千萬直仍命
內侍分董其役明年春法堅製金觀寶函納前舍利等
入奉於內道場贊唄三夕兩街威儀道首滋福殿帝薦
香以送之季商協吉歲於石室五年繼賜乘輿副物貨鏹
萬緡以更餘費乾興初又以塔心殿棟須合抱修幹
既選未獲貫於皇帝上方以天下為公且重違其請莊
太后時為皇太妃乃以奩金三百萬輸於內府市材以
施之天聖改元內出明德太后寶器價二百六十萬洎
莊獻服用千餘萬付之公帑易金銅鑄之蓋以施之美
哉四門九級岌業天中十盤八繩晃曜雲際道堅又以
巧漫雖畢丹采剝剝未完徧募擅信獲緡一萬八百洎
法堅稟給餘貲三百二十萬以償其工上繼志有嚴奉先
惟孝宅心凝覺追福太宮由二級而上命奉安禰廟至宣
祖皇帝四室神御並列環衛拱侍左右自餘緣塔功德未

具者皆省服御成之由是賢劫之象薩埵之容五佐
星緯八部人天分次峻層罔不咸備七年功畢詔賜
茲額金榜始嚴屬軒臨視談贊五尼賚紫方袍并賜
近院官舍九十區僦直充供明道二載上給白金五十
鎰俾營獻殿先有陳元度拾僧伽像張延澤施羅漢像
頗極精巧道堅復建二殿夾峙於塔以奉之又嘗諷法
華孔雀經二殿以次之景祐中上賜錢千萬創二樓於
塔前右安特旨所賜龍箬作香輪以轉千函左挂莊惠
所拾鐘樹彫格以維九乳其斜廊壁繪羅漢迦文像亦
莊惠之施粵自營創逮夫圓成則有宗藩施三門洎無
量壽像鄧國貴主施報身像尚宮武氏施法身像朱氏
施藥師像何氏施下生像晉國夫人張氏施工繪獻殿
壁潁川郡君韓氏拾圃於西戈水杜航拾地於東及其
季尚繼獻金銀壽春王文獻緡錢義學比丘端深指教
相文字比丘惟儼著錄塔吳門應德興為匠石皆道堅願
力所召共周能事者也厥初妙善嘗夢塔相止於隻足

談者以為上善繼之祥也塔成忽一日遠望如失靈
袂環遶之異也道堅故通事舍人杜志儒之女母明德
從父媵再適故殿前指揮使武成軍節度楊信封龐西
郡夫人道堅生九歲即齋素十有一求捨家興國八年
剃度得戒明年賜紫伽梨十有六授慈懿師名嗣掌妙
覺月給俸料三時賜衣歲度僧薦紫各二隴西夫人隨
子剝染暮年歸寂道堅天機警悟資性嚴整有大丈夫
風槩嘗誦法華千卷華嚴首楞淨名圓覺皆數百過記
憶教箴誡通大義塔之規模盡出智匠總三院之務安
數百之衆以慈悲攝嗔恚以精通攝懈怠故能念舉而
物應身動而衆隨羣蠶表異織鱗示應作大因緣終始
圓就明道中詔加福慧之名嘗談經於觀文殿有旨賜
居衆食料道堅以為出家分行折伏驕慢赴請之飯猶
起諸漏彷徨移晷切辭仰給每院但受月廩作糜米十
斛聞者與之謂其知分夫以柔弱之賦婉孌之姿其間
具明淑之德習師傳之訓不過佩服詩禮蹈履謙祗体

蘋蘩之柔潔法山河之容潤而已其能斷棄愛染脫離
塵垢以堅固為佛事以勇猛趨寔際濟法心華坐空蘊
樹者何其偉歟古之后族出入宮掖憑藉聲勢狃快恩
澤外交王侯旁出姻援不期驕而自速靡羨侈而極懷
載之前聞為鑒耒轍者有矣其能遠委光寵杜絕徼望
辭榮於宗屬等志於貧賤以喜拾化俗以高潔自持者
抑為難哉宜乎萬乘待遇六宮景慕成支提之上緣到
無生之彼岸者也於戲是塔庀功二十年規平三百尺
高二引有六丈經用一億旁廡佗舍無慮五百楹自非
景祚和平累朝信奉設有宏願烏可成邪是知諸佛慧
命其待時而興也夫議者皆以為聖上於是塔大美者
四中出寶幣形民力也日就勝因暢先謨也敦勸於下
使趨善也命書厥勞庸展親也所宜鬼神潛衛海域延
仰永集絕嘏施及懷生者為臣早預翻經嘗更約史仰
被臺札靡敢固辭謹按塔者梵云窣堵坡此云靈廟在
於諸天則葺佛爪髮衣鉢在於西度則記佛降生經行

演說圓寂之所一以表人勝次以生地信三以報重恩
四果之位能超三界故有級初至四級者如來出十二因
緣故極於十有二級焉迦葉滅後婆羅奈王起七寶
塔為作銘記豈非刻石之識抑有初邪或問古今哲王
之導黎庶不專講六藝而參用三乘豈其大抵同歸於
善乎臣嘗試論之夫有生之源本始清淨寂則絕待於
一物感則資始於萬緣之靈無方至虛善應覺者則圓
通罔礙湛寂自然內不立於寸心外無累於羣境不為
世界之所流轉不為幻妄之所變移迷者則奔馳萬有
昏翳五欲習動而不能靜入業而不能捨失本明而不
知沉諸趣而不恨所以能仁愍之出現於世法不廣大
不能包種性喻不善巧不能破根蘊窮理而至命象繫
之旨也率性而達道中庸之意也好生惡殺仁義之均
也防非致和禮樂之則也聖人以為外扶世訓佑生民
內可以澡心源還妙本所以崇其塔廟尊其教戒自東
漢以來歷世多矣其間執分別之論起歸嚮之疑廢之

而逾盛毀之而逾信豈非言底乎不誣理冥乎至當者哉昔有人云百家之鄉一人持戒則十人淳謹百人和睦夫能行一善則去一惡則息一刑一刑息於家則百刑措於國以此觀之則斯法之未禪我之治蓋亦多矣上具大智慧有大威德神道以設教文明以化人宴坐黼帷鋪觀貝牒信解出於天縱悟入自於生知指曹溪頓門則言高達摩覽竺乾半字則義中悉曇寔玉毫之化身託金輪而救物未階鋪砌孰望清光而况投筆端闡屬韃遠戎據案受簡摩盾操觚但緣外護之仁少叙重熙之德謹我二十有四頌以勒銘云

於鏢帝宋氏睿明繼臨照百度恢大功三歸崇正法辰
居靈紫微東郊配蒼震有大除饑女肇營宴坐場九級
締層楹兩朝施寶玩八觚回日月百尋切雲霓七佛儼
金容四聖崇睟表琢刻具千覺圖繪周萬靈鉤楹蔭璇
題高簷幕珠網龍天乍來云煙霞時蔽虧我聞上帝宮
昔在莊嚴殿八萬窓牖柱衆寶極彫飾曷若佛滅後隨

緣崇廟貌設利羅如芥蘇偷婆如果有盤若棗葉有像
若麩麥其福已勝彼無量千百億况惟此聚相密迓於
國城樓觀相飛注康莊四通達宰官引鏡吹公侯聯旆
蒸都人集袂惟王姬傳車水流景啟清旦行月麗中宵
幡影鋪九衢鈴風聞百里我願瞻仰者應起大乘解悟
此聞見性充滿於十方我願供養者應發菩提心覺此
煩惱本清凉源我願掃除者應生精進力反此塵
勞身徑度禪定業我願旋遠者應作三昧觀轉此顛倒
想頓入清凉慧寂念以為地般若以為基正受為化鬘
解脫為宝篋藏此無價珍非空亦非色遠謝修證垢竝
祛照覺蔭水澄滓乃去火盡灰亦飛法縛既解除神通
自遊戲若於權寔際犹有一微塵欲求見如來尚隔須
彌聚佛祖秘密印華梵微妙言語默及思維不越於此
義後之登塔者應知建塔因蓋表調御德起發淨信心
掩日不為多聚沙不為少但能復本覺即成無上道朝
家光四葉尊重於寶乘真祖創妙緣鴻禧昌厥後吾皇

授曩記成此殊勝果壽考億萬年永庇大千界

欽定四庫全書

文莊集卷二十七

宋 夏竦 撰

青詞

建隆觀青詞

為奉安內降昊天帝
并五帝入殿慶讚

伏以五帝御天素嚴於真像三秋協吉爰即於靈祠仰
慶威光聿遵科教建清場而有翼陳法醮以惟馨虔佇
鑒觀誕垂福祉謹詞

荆南府紫府觀開啓皇帝本命青詞

伏念臣祇荷慶靈紹隆基業仰繫真蔭俯庇民區屬茲元命之辰敢效祈思之禮冀垂鑒佑介以福禧俾膺壽考之祥永布希微之化無任懇禱之至謹詞

兗州會真宮等處為皇帝本命青詞

伏以時惟首夏逢本命於良辰恭安明科建清場於秘宇仰祈真蔭誕降多祥億載延鴻願增於遐壽萬方富庶永庇於懷生無任懇禱之至謹詞

兗州會真宮等處皇帝本命啓告玉皇青詞

伏念臣度膺秘訓司牧中區式屬清辰叶於元命言瞻靖館恭舉於明科對越層穹仰歸於精意敢期景祐永集眇躬無任懇禱之至謹詞

兗州會真宮等處聖祖青詞

伏念臣欽承寶緒祇嗣慶基屬元命之清辰方翳於道蔭瞻靈區之靖館敢薦於精誠仰祈燕翼之慈永錫隆昌之佑保茲冲眇下庇蒼黔無任懇禱之至謹詞

兗州會真宮等處皇帝本命啓告三清青詞

伏念恭承道蔭俯庇民區時既戒於朱明日載臻於元命敢舉列真之典式仰延三境之光靈冀開降鑒之恩申錫函懷之福誕垂嘉應永佑彤躬無任懇禱之至

皇后為皇帝本命醮青詞

伏以少皞司方啟初秋之令序聖君撫運屬本命之清辰是敢祇舉明科恭陳法醮伏願皇帝博延真蔭茂合天和金格陞名永保長生之道瑤圖積慶誕膺申錫之祥允罄精誠仰祈冲鑒

鳳翔太平宮玉皇青詞

伏念臣祇荷慶靈紹隆景命式屬清和之候寔當生育之辰敢助真祠仰陳馨薦伏冀玉虛降鑒颯御下臨永錫祺祥佑茲冲眇無任懇禱之至謹詞

鳳翔太平宮三清青詞

伏念祇奉駿命虔嗣丕基惟恭首夏之辰式屬誕生之日敢依靖館恭薦令儀方冀靈心允孚貞隆俾迺膺於壽考庶永在於華夷無任懇禱之至謹詞

杭州天柱山大滌洞霄宮玉皇青詞

伏以季夏戊辰元符紀節度依妙教恭啟清場仰冀鑒
觀誕昭况施降多祥於溥率襲嘉慶於眇冲永洽真風
式彰丕應無任懇禱之至謹詞

在京諸宮觀開啟下元節青詞

伏以水官布度紀節於上冬靖館崇真祈恩於法醮敢
冀降鑒之德益隆丕冒之祥介萬壽於渺躬襲太和於
品彙永康綿宙允迪靈歆謹詞

在京諸宮觀開啟降聖節道場青詞

伏以玉燭均和肇宣於寒律景輿昭格式紀於良辰敢
祇建于清場用仰祈于真貺冀靈心之鑒祐錫繁祉以
冠鴻永竭對越之誠仰謝碩懷之德謹詞

真遊殿玉皇降聖節青詞

伏以顯頊司方應鍾紀律當先帝上封之日是飈遊降
格之辰即內殿之凝嚴建清場之肅穆冀景輿之臨暨
垂介福以來同錫萬壽於眇冲薦百祥於宗社永洽和

平之治式昭眷顧之靈謹詞

玉清昭應宮明慶殿天祺節青詞

伏以飈游昭格嚴廣殿以崇真寶錄薦臻協靈辰而紀
節謹依科式恭啟壇場伏冀六羽降監九清垂蔭宗祏
熙盛茂擁於多祥億兆歡康永宜于至治無任懇禱之
至謹詞

真遊殿開啟天祺節玉皇青詞

伏以飈馭降臨載嚴於秘殿珍符申錫式過於良辰敢
展案於壇場用歸誠於霄極冀臣民之有幸錫福祉以
無疆永保鴻鈞寔繁靈祝無任懇禱之至謹詞

祥源觀皇太后為皇帝乾元節青詞

伏以首夏冲和屬嗣君之誕日殊庭蠲潔啟靈寶之真
場仰冀鑒觀聿隆右序願享延鴻之美益固于丕圖庶
宣清淨之風永康於率土

真遊殿聖祖青詞

伏念臣幸膺真蔭祇嗣丕圖式當生育之期敢罄齋明

之懇虔依秘宇恭啟於清壇仰竚颺輪載陳於法醮願
綏福祉永祐眇冲

三清青詞

伏念臣獲奉寶圖紹膺景命爰屬誕彌之月式陳昭事
之儀伏冀三境降監百靈孚佑永綏冲眇克降壽考之
祥仰報虔靈敢息齋明之禮

玉皇青詞

伏念臣虔膺駿命祇嗣丕圖維茲首夏之辰寔屬誕生
之月敢恭遵于科式用仰達于誠明伏冀紫宸鑒觀颺
游降格俯昭靈貺永祐眇躬

東嶽青詞

洪惟有帝宅彼岱宗主陰隲之司溥臨於下土紀降生
之日式屬於季春敢恭舉於明科用仰伸於昭事永繫
鑒佑申錫祺祥無任懇禱之至謹詞

會靈觀五殿各開啟道場為民祈福青詞

伏以駿極尊方寔司於陰騭清和布序式屬於正陽敢

展案於壇場願降康於縣寓俾羣生之共泰表美應之
薦彰獲賴神休永嚴馨薦無任懇禱之至謹詞

又會靈觀凝祥池崇禧殿道場青詞

伏以仰尊維嶽並建於真祠旁湛靈淵中嚴於秘宇屬
茲首夏式啟清壇永祈申錫之祥遍福懷生之品俾躋
富壽庶洽歡康無任懇禱之至謹詞

又襄州會真宮道場保護邦國為民祈福

伏以東岱司春式屬發生之候殊庭集福素嚴辟穆之
容敢祇啟於靈壇用仰祈於道蔭伏冀九清孚佑彌錫
於邦家六氣均和永隆於民庶無任懇禱之至謹詞

簡穆皇后青詞

上世開基大雅播姜任之德奉先薦祉真乘崇釋梵之
宗伏惟簡穆皇后詔範坤儀騰芳仙籙堯門啟聖繼天
之祚無疆閭苑登真配帝之靈如在今皇帝功高繼志
孝極因心昭事闕宮備物既伸於常祀永懷茲景茲辰
更奉於良因陳淨供於寶階敷妙音於海歲聿申精義

仰薦神將簡穆皇后伏願由文母之尊崇證法王之自在百千相好圓成十號之身億萬期年永佑重熙之運今皇帝伏願二儀顧謨衆聖護持河洛凝祥早膺於瑞籙靈椿比壽大庇於中區然後願藩屏懿親益著盤維之德鈞樞近輔更隆柱石之勲珠躔順軌于九霄玉燭均和於四序萬夷率服咸歸舞羽之仁多稼順成克叶期箱之頌

昭靈皇帝青詞

伏以厥初生

在聿追耒孝屬諱日之爰

臨恭憑最上之乘式薦無邊之福昭憲皇后倪天表慶履帝凝祥顯著厥靈文武之功並起肇基大業姜任之德尤尊今皇帝祗紹丕圖永懷慈景黃彝進裸聿嚴清廟之儀法雨飄花特啟紺園之會昭憲皇后伏願乘茲勝果超彼真階

孝明皇后青詞

伏以彤史垂芳聿懷於慈景紫闈徹樂式屬於諱辰恭

憑最上之真乘仰薦無邊之妙果孝明皇后凝祥沙麓
表德素舒仰瞻清廟之靈方遠鈞天之馭今皇帝禮崇
追養孝極因心夙啟祇園恭修梵會陳寶階之淨供演
法海之潮音孝明皇后伏願花界棲神鷲山悟法享諸
天之妙樂佑億世之丕基皇帝伏願諸佛護持萬靈薦
祉永保後天之壽長為諸夏之尊然後藩屏懿親協宣
於忠力鈞樞近輔共贊於昌朝凡居率土之濱共洽梵
天之福

熙陵開啟忌辰青詞

恭以太宗削平中夏濟世之功至大賓天之駕難留敢
當撤樂之辰虔即因山之域載嚴象設祇啟壇場伏惟
三境鑒觀百靈拱衛恭仗希微之教仰資汗漫之游申
錫美祥永昌嗣業無任懇禱之至謹詞

太祖皇帝殿醮文

皇帝仰遵先志深測庶民昨以離畢愆期食苦興軫仰
禱克開之烈果應大有之祥雨均十月之期穀倍萬箱

之獲歧行永息協氣咸充爰卜靈辰恭趨秘宇親奉馨香之薦聿伸報謝之誠伏願基緒遐昌瓊祺沓委四時合序常等豐茂之期萬壽無疆永享延洪之祚

寶符閣醮文

皇帝某祗席洪圖恭臨率土昨以三時在務百騰潛生欲傷南畝之苗未降西郊之雨精心載禱悉殄於行跋膏澤載零遂豐於多稼是消吉且祗款層楹躬播鵲尾之香用答鳳軒之佑伏願萬靈禔福六氣均和大穰盈車常薦有年之瑞赤文候日更膺疇德之符

天慶節醮文

右伏以河出圖洛出書聖人則之象天命也故紀於官則雲名鳥氏籍於典則八卦九疇歌於詩則寶鼎芝房紀於年則黃龍甘露豈若我尊號皇帝陛下即位之十一載重熙累盛際地接天正月肇春望舒哉魄受帝文於象魏成茂典於天孫爰紀靈辰標為慶節峙清壇於萬寓報繁祉於百靈名青瑀而命素威禮蒼龍而祀金

虎恭願玄元敷佑上帝降祥永壽考于南山固本支於盤石以致騰黃服皂錄耳梯山吐淳曜於絕垠飛景炎於往號巍巍蕩蕩子子孫孫某無任祈天禱聖

修洪州廳畢設醮文

伏念臣叨領藩條獲若郡解顧惟廳廡積有歲時棟宇隳頽基坳卑陋惧有傾壓爰用繕修既鳩僦於工徒慮震驚於防禁是敢虔修科醮仰謝靈祇伏冀大道延慈百神垂佑軍民歡泰藩府謐寧風俗還淳嘗空於庶獄陰陽順序永錫於康年誕集多祥副茲精志無任懇禱之至謹詞

設醮文

伏念某本以微生竊依真教虔遵善道仰對靈心然而任歷藩維職司厨傳網條所限須用威刑使駟繼來難停烹宰又念業塵久積心境未澄惧有愆尤仰違慈儉是敢虔修清醮自露丹心依首過之明科瀝求哀之深懇伏願三清降鑒衆聖垂慈除赦前非希昭後福星辰

運動永消臨照之災天地保和常錫安寧之佑誓將勵節仰謝洪恩

夏醮文

伏念臣欽膺寶命大庇縣區念溥濟于郡生每增勤于
旰食惟仰繫于道蔭用茂合于天和屬茲隆暑之辰敢
薦祈思之禮冀九清之享俾俾百福之來同保以康寧
四序常均于喜氣錫之壽考萬年永遂于多歡載罄精
衷仰承嘉應

祝文

明慶殿謝雨祝文

皇帝祇嗣慶基恫矜庶彙昨以農時在務膏澤未零仰
罄齋明聿伸祠禱驕陽盡弭羽孽爰銷亟成豐楙之祥
天洽沖和之氣是消良日躬款殊庭度奏飛香仰酌真蔭
皇帝伏願璿源益濬壽嶽彌高祉福紛綸更茂隆昌之
慶蒼黔安泰永臻富庶之期

祈晴祝文

維天聖四年歲次丙寅六月乙卯朔二十日甲午嗣皇帝臣謹遣推忠協謀同德佐理功臣樞密使武寧軍節度管内觀察處置等使開府儀同三司守司空檢校太師兼侍中充景靈使兼郿牧制置使行徐州大都督府長史上柱國魯國公臣曹利用謹上啟聖祖上靈高道九天司命保生天尊大帝伏以方迴溽暑肇戒青商大田垂豐茂之期積雨有滯淫之懼比修馨薦虔奠靈休精誠溥伸感應如嚮

紫微殿祝謝文

皇帝夤威寶命率育懷生昨以膏澤愆時飛螟暴稼精衷既禱果蠱疾之咸消嘉雨頻霑遠豐穰之倍異是用載嚴法御祇款清都親薦馨香恭酌况施伏願靈心鑒佑道蔭延鴻拂石為期遐增於睿筭夢魚獻兆常遂於有年

東樞相公宅上梁祝文

昨因私第密邇太宮冒瀆凝嚴願從遷易荷聖明之從

欲頌奕瑄以定居既繚牆垣式分柱礎載涓吉日用架
脩梁敢薦明馨仰祈祉福伏冀門庭慶樂胷緒蕃昌永
洽天和並繫神造伏惟尚饗

設供文

伏以敷揚正法早降外護之緣饒益羣生敢仗大慈之
力竊念臣虔膺景命司牧中區每繫微妙之因允洽和
平之治近茲郡縣絀產螟螣既害及於蒼黔遂力行於
翦撲事非獲已須至於傷生理既可哀是修於勝利捨

茲服用備此香華奉具足之金容啟莊嚴之刹天階陳
供祇薦於馨香海藏流音宏宣於秘密一則以福茲
蠢動虔頌悔謝之誠一則以救彼沉淪俾脫昆蟲之報
伏願慈雲布潤慧日凝暉迴自在之悲心遂無邊之善
利

疏文

奉天節祝聖道場疏

右伏以降聖丹陵標祥乙日南山比固六官歌天保之

章千載為期九服有華封之請禎符景緯善洽要荒恭
惟尊號陛下天表龍犀廟傳龜鼎辭軒四國頌瑞九房
薦玉帛於岱郊受圖書於河洛當里社效靈之日是幅
員祿慶之時臣獲總典魚符叨馮熊軾負庭實而特先禹
會秋兕觥而尚遠堯階敢舉奠章恭依象法大啟蓮花
之界廣宣貝葉之又妙音充滿於虛空法雨露濡於億
萬勝因周徧皇覺證明伏願我皇帝陛下德茂圓方功
崇夏子本支百世超盤石於漢家考考萬年邁冥靈於
楚國干戈不試袍鼓稀鳴諸戎款服於三邊多稼櫓生
於萬井民歌畫一士賦登三鴻徽濟美於祖宗茂實流
芳於方策凡居率土感切傾心

進功德疏

妾伏以朝真景毫効駕清畿九成之樂載陳三獻之儀
允備妾限居宮掖莫奉粢盛仰依大覺之慈恭慶垂鴻
之典願三靈之宅粹永萬壽以宣和祝頌增虔倍百常
品

Blank page with vertical lines.

